

在园杂志

刘廷玑

文硕阁

wenshuoge.com

目录

关于我们	3
序	5
●在园杂志卷一	6
●在园杂志卷二	21
●在园杂志卷三	52
●在园杂志卷四	67
●跋	89

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望可以帮助有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

序

●序一

古今风尚各擅一代如清谈着于晋小说着于唐虽稗野之语多有裨于正史近代谈部说家有栎园书影钝翁说铃西陂筠廊偶笔悔庵艮斋杂说渔洋之居易录池北偶谈分甘余话诸种短则微言隽永长则骈辞赡丽皆窃义于晋唐之残编固有所本也予欲汇成稗海为万年太平头白汗青之助但削牍浩繁疲精费日久萦于怀亦非细事矣今游淮南又读在园杂志或纪官制或载人物或训雅释疑或考古博物即夷坚诺皋幻诞诙谐之事莫不游衍笔端核而典畅而韵有似宋人苏黄小品盖晋唐之后又一机轴也曾南丰曰所谓良史者有四长焉其明足以周万事之理其道足以适天下之用其智足以通难知之意其义足以发难显之情今观杂志四长已备孰谓小品不足以牖列金匱石室为操觚班马所取材也虽然古之秉史笔者其体严其书直若野史杂记又多恩怨好恶之口今在园所著潇洒历落于人无嫌于世无忌读之者油然以适跃然欲舞且悉化其溪刻凌厉之气不知何所本而能变史笔为写心怡情之具以感人若是耶予挑灯三复乃知在园先生今之贤大夫而以诗名者温柔敦厚出于习性退食之余偶忆旧闻或有新见书以示子孙拈与宾客浮白轩渠其作史之笔仍然作诗之笔也古以太史采风今以乐府演史与诗盖二而一者也康熙乙未初春云亭山人孔尚任撰

●序二

余少习举子业键户呶唔其于五车二酉未能寓目及壮以门荫通籍服官终日满眼风尘劳形案牍更无暇也乃年逾周甲而足迹未能半天下故耳所闻目所见身所亲历之事无多今值河工久庆安澜得于退食余闲焚香静坐或与二三宾友煮茗清谈偶有记忆辄书一纸投篋中积渐成帙一日启与孙辈指说客有见者曰曷付梓余曰昔人著书立说或穷天文地理务为高远或搜诸子百家以显秘奥其次亦有所托以寄恩怨而存讽刺余则无是何梓为客曰乾坤经史昔人言之详矣若恩怨私情也讽刺微词也古来文人才士往往以此受谤皆无足取是帙正以陈言务去无恩怨无讽刺方使阅者怡情益智何况所志者昭代之制度名公之经济其它文翰诗词新闻俗谚即日用寻常无不考核精详推原所自至于神奇怪诞虽惊人魄实解人颐不同于夷坚虞初凿空镂幻悉皆耳所亲闻目所亲见身所亲历者绝非铺张假借之辞梓而问世自可法而可传耳遂强付剞劂余因纪其言以弁简端康熙乙未春初辽海刘廷玑自识

●在园杂志卷一

岁甲午圣寿六旬有一是为本命元辰普天瑞应不胜详敷四海内寿臻百龄奏请建坊以表熙朝人瑞者如福建巡抚满公保具题德化县老人百岁镇守宁古塔将军孟公俄洛具题李三年百有三岁直隶巡抚赵公弘燮具题文安县原任副将马自新妻徐氏百岁江南巡抚张公伯行具题山阳县张氏百岁湖广巡抚刘公殿衡具题江夏县欧阳氏百岁陕西巡抚永公泰具题醴泉县丘氏百岁咸于甲午同登期颐是寿域弘开之征也又山东巡抚蒋公陈锡具题李氏一产四男若一产三男者甚多是户口广裕之征也再浙闽总督范公时崇随驾热河每赐御用食饌内有朱红色大米饭一种传旨云此本无种其先特产上苑只一两根苗穗迥异他禾乃登剖之粒如丹砂遂收其种种于御园今兹广获其米一岁两熟祇供御膳又有白色黏米系树天生一株软滑似黍不胶齿牙此皆希世珍品外间不独未见抑且未闻是草木休应之征也咸据邸抄未敢臆说汉军乡会试屡行屡停国初甲午准乡试癸卯覆试解元为镶红旗姚启圣己酉庚戌后三科乡会俱行丁巳以用兵复停自庚午辛未复行至今癸巳万寿六旬特开万寿科乡会试汉军广额复准监生等应武乡试从前壬辰状元麻勒吉乙未状元图尔宸俱满洲试满文近则满汉一体文武兼收矣

本朝汉军汉人一体简用内外不分近日惟科道部属小京官汉军不占汉人员缺康熙五十年间汉军补汉缺者大学士萧永藻吏部尚书桑格兵部尚书孙征灝刑部尚书郭世隆侍郎学士暨司道内升之京堂共二十七人在外督抚共八人可谓极一时之盛

本朝文武并重有以尚书补授都统以侍郎补授副都统者有以都统补授大学士以公补授尚书以副都统补授侍郎者至于郎中员外佐领世职有时以武迁文有时以文迁武其文武兼管者比比而然外官以督抚升副都统者有之而武升文者甚少近年惟福建将军金公世容升闽浙总督提督梁公鼐亦升闽浙总督提督赵公弘灿升两广总督南巡时张禹岩圣铎以阿思哈尼哈番特授淮扬金事故余赠诗有丞相亦曾为太尉监司适合简将军之句再汉人未有补旗缺者近陕西总兵官汉人何天培补镶白旗汉军副都统温州总兵官李华平阳总兵官王应虎皆汉人俱升补福建驻防汉军副都统提镇以文改者张大理卿云翼改江南提督姚郎中仪改湖广总兵官圣朝简用总以得人为要固无分文武内外及旗汉也张紫凝杓乃阿思哈尼哈番改授淮扬道金事张禹岩圣铎之长公也已成丙戌文进士因父故应袭世职遂授为阿达哈哈番兼一拖沙喇哈番父以武改文子以文改武事亦奇矣紫凝原効力河工承袭后仍赴河工引见时上念其父河上劳臣惋惜者久之又命赋诗背诵古文颇惬圣意颁赐渊鉴类函佩文韵府朱子全书共四十三套以武臣而上蒙赐书且如许之多亦从来未有之异数也

布政使升巡抚衔止都察院右副都御史未有兼部衔者先祖任布政使九年屡推巡抚蒙世祖皇帝特谕江南财赋重地且叫他多管几年及推福建巡抚奉旨刘汉祚久应巡抚今已迟矣着给兵部侍郎兼都御史职衔二品服俸

康熙四十六年圣驾南巡予随皖抚六家叔扈从蒙圣恩垂问先大父闽抚右司马旧事六家

叔自从龙历任奏对详明又问子孙居官几人予跪于后六家叔指名奏上天颜有喜御赐书拊循江表旧德貽谋二额谢恩毕恭捧而出陈相国廷敬查学士升见之因谓曰拊循江表赐中丞公也旧德貽谋此赐观察耳予方悟赐二额之意因将旧德貽谋悬于京师西华厂之赐第恭纪七律二章悬额之日都统李公林盛在座指示曰圣意不独奖励观察今观

【脱察字】七孙渐次成立天恩期许者至矣真异数也诗载葛庄分体

文武全才原不易得如曹氏父子之春夏读书秋冬射猎傅弈之上马击贼下马草露布郃谷之说礼乐敦诗书祭遵之雅歌投壶王阳明之较射三发三中此皆以文能武以武能文古今不可多见者若习武者目不识丁习文者力无缚鸡未免偏废矣本朝汉军文试先较弓马武试俱考策论监生准武乡试武举准文会试一【一：立】法最善自然奇才并出而国家收得人之庆矣

皇上祀祈谷坛见卿贰及御史顶上嵌东珠因其僭越下部议嗣后各官七品八品九品加级者顶带不准过五品六品【脱五品二字】不准过四品三品四品不准过二品二品不准过一品盖一品顶嵌东珠二品大学士尚书亦嵌东珠三品红顶四品蓝顶各有等威不准过也今予降补金事实系五品莅任后奉旨补给前江西按察使诰命授通议大夫故用三品顶带坐褥非敢僭也

东坡云谪居黄州五年今日北行岸上闻骡驮铎声意亦欣然铎声何足欣盖久不闻而今得闻也昌黎诗照壁喜见蝎蝎无可喜盖久不见而今得见也予由浙东观察副使奉命引见渡黄河至王家营见^廿棚下挂油煤鬼数枚制以盐水合面扭作两肢如粗绳长五六寸于热油中煤成黄色味颇佳俗名油煤鬼予即于马上取一枚啖之路人及同行者无不匿笑意以如此鞍马仪从而乃自取自啖此物耶殊不知予离京城赴浙省今十七年矣一见河北风味不觉狂喜不能自持似与韩苏二公之意暗合也

衙斋署一联曰所到处随弯就弯君其恕我者些时倚老卖老臣不如人细按之不脱人我相且有火气不若督河右司马赵公世显座右书只如此已为过分待怎么才是称心如此二字有许多现在之富贵安乐在内怎么二字有许多无益之侈心妄想在内二语殊觉谦退知足无穷受享春日按部淮北过宿迁民家茅舍土阶花木参差径颇幽僻主人叶姓由博士弟子员而入太学者人亦不俗小园梨花最胜纷纭如雪其下西府海棠一株红艳绝伦因忆老人纳妾一绝二八佳人七九郎萧萧白发伴红妆扶鸠笑入鸳帏里一树梨花压海棠不禁为之失笑草堂中悬林良画傍列一联倚槛云来往开帘花送迎系查声山学士升所书一见姓名如逢故友声山于武林订交二十余年今已下世又不禁为之伤感矣

江南陕西湖广省分太大有上江下江湖南湖北之称故设两巡抚分隶其事所属司道亦分为二惟先祖为江南布政使司则十四府四州俱属一司先祖历任九年任满后始分

本朝易名之典最为慎重非奉特旨还与他谥不得与焉阮亭先生详考开国以来谥法附载张山来潮昭代丛书意盖有在也后先生以大司寇致仕未叨大典友人及门私谥曰文介先

生以成先生之志先祖以署国子司成从龙入关改河间太守历八闽开府予告家居卒后亦未与大典同乡老友周侍郎亮工受业门人马中丞佑柯吏部鼎达比部岱私谥文肃先生

前朝有三司六道之说三司者都使司布政【脱使字】司按察使司六道者布司佐贰为左参政右参政左参议右参议按司佐贰为副使僉事都司管各卫操军屯田存寓兵于农之意多以侯伯领之故为三司之首布按驻札省会参议参政分守外郡在省则管粮储钱法等事【脱副使僉事分巡外郡在省则管驿站学政等事十八字】

本朝兵制居重驭轻分八旗屯住京师分防各省其都司止令僉丁运粮催征卫课而已迁转不过一游击衙各道嫌其冗杂去左右之名外郡有守者裁巡有巡者裁守事权归一操纵甚便是三司止两司而六道止四道也

明初每府设知府一员同知一员通判一员或二员推官一员幕僚则经历照磨知事检校知府统理一府各属州县诸务同知则同知一府之事通判专用朱墨笔僉判文牒间有分管粮储水利者所以有二推官专理一府刑名清晨同坐大堂率领各吏办理诸务印封耳房库内出入不由私衙堂左为经历司有印官名经历事事必由经历惟恐不足又以知事一员佐之堂右为照磨所有印官名照磨事事必由照磨亦恐不足仍以检校一员佐之后渐不由旧制率多分管如清车【车：军】驿传河防江防海防捕盗马政巡盐运粮水利之类丞判各司其事各有处分推官专司刑名兼管查盘印则知府封掌佐贰不敢过问

国初少沿明制近则推官奉裁判刑名总归知府同知不知府事通判不判文牒惟署印押粮解饷以及杂差而已至于司所幕员但存经照间有知检者印归堂上官亦虚设亦不过听差而已然在明朝立法未尝不善未免事少官多十羊九牧不若今之权归于一不许掣肘之尽善也

抚军张公伯行乙丑进士需次中翰初任题授山东济宁僉事升江南按察使特旨以僉都御史巡抚福建释褐后三迁而至开府亦奇遇也

宫保黄公大来在督师李大司马之芳军前历着战功加左都督职衔初任即授宁波总兵官卒赠太子太保

浙闽总制大司马瑞图刘公兆麒先任湖北抚军其时中丞殿衡尚为公子读书楚署及后历任湖北抚军父子前后开府同在一地已属可传佳话后闻制府讣暂归读礼服阙再补仍抚湖北是趋庭游宦三驻楚焉又中丞先由陕西大参升江苏藩司其时署理藩篆者则苏松粮道乃兄殿邦也二公为同胞兄弟中丞嗣于伯隶旗故旗籍而少参则宝坻民籍也以嫡亲手足接受交代一月有余彼此俱用文移往来亦一仅见者中丞之公子嵩龄与其师夏慎枢同中顺天乡试刘于癸巳夏于壬辰俱成进士又馆选同为翰林岂非可传之盛事哉

李梯云检讨天祥云永年张五美生于嘉靖甲寅中于万历乙酉乡试其子鸿基生于万历甲

寅中于顺治乙酉乡试

翰林学差典试赴湖广者多不利于榜眼辛未榜眼吴永年曷甲戌榜眼顾书宣图河丁丑榜眼严宝成虞惇俱卒于楚京师烂熳胡衡亦不利于榜眼居停而卒于其地者戊辰榜眼查荆川嗣韩丙戌榜眼吕无党葆中

于勤襄公成龙以大司马大中丞总督河道公文武全才经济勋业赫然一时大驾西征时公总统督运军储充裕圣心宠眷功勒旗常朝野倚重然而治河非其所长所谓人各有能有不能也公赴河工题带人多不谙河务乃以顺天府丞徐公廷玺副之两不相下议论参差权难画一公以勤劳致疾不终事而卒于官时论惜之上念东南民生运道特简遂宁先生加宫保大司马治河而副总河报罢先生辛勤况瘁事事仰遵指授历九年河工告成昔之泽国今桑麻矣排淮泗而注之江上古淮泗并未入江明永乐间罢海运命陈平江伯瑄开通运道由江南山东直隶直达京师淮泗之水以三分济运入江七分敌黄入海此老生常谈所云以河治河不独去其害而且资其利者是也即潘季驯先生河防一书其中亦有词不能达意处在治河诸公无不知蓄清刷黄为要然此四字有无穷经济无穷学问非细心体认因时应变者不能也天府金钱糜费固不可太省亦不宜必身历其事久而且熟方知其中关键余随遂宁先生数年见其不避风雨相度形势可谓精详之甚犹虚心访问择善而从同事者淮扬李佺事梅湖南刘少参光业先为桃源同知者接任之桃源孙同知调薨皆蒙遂宁先生驱遣颇为历练老成可惜俱下世矣今我辈随右司马中丞赵公恪守成规保固无虞虽遵圣主指授感河伯効灵而遂宁先生垂勦之功莫大焉

浙江卞布政使永誉升任福建抚军初莅八闽制府兴公永朝同将军都统诸公皆郊迎相见欢洽既别卞公减驺从乘四舆仍用藩司仪注持升任布政使手折坐官厅候见制府谢不敢当盖浙闽二省皆制府所统辖其先为属吏也公谦退自下时论以为得体故益称和衷焉先时有藩司某内升通政司闻报即用大银台仪注鸣锣开道往拜抚军乘舆直入仪门抚军笑而优礼之随亲盘司库题参亏空甚多不独落职几毙狱中又河南一副将当新定文武相见仪注时往谒抚军公然鸣锣直入辕门至仪门下马抚军不加拒绝即待以新仪注之礼及散餉届期乃令监放官备加搜剔凡私占影射俱开虚冒兵餉题参正法斯二事虽抚军器小而亦可为无礼肆纵者戒也予昔待罪西江稔抚州太守张伯琮之才守遂荐举卓异张君感余知己愿执弟子礼今已升任河南臬司而余已左迁监司然时通书问犹用手折称门人则过于谦抑矣

居官固宜清正亦须和平倘一偏执则处事不能周详人情难以通达未免美中不足古田余祭酒正健家居奉特旨督学江南先君以遗爱未泯士民感颂不忘请祀名宦已由府申司例必学院批允方可遵行道路相传余公严厉不独不可干之以私即往来书函亦难轻投予自念今皇上忠孝作人而余公读书君子未有不以忠孝宅心者予修禀揭直投上请即使撻怒达诸九重为亲受过自甘不辞乃余公竟答一函不但如我所请而且词语谦逊始知真清正者未有不和平者也昔先祖闽抚中丞公前任江南通省布政使士庶迄今家尸户祝吁前督学请祀名宦乃托词历年久远无从稽考揆其意非出固执即存私念且不喜扬人之善此等

品行较诸清正和平者何啻霄壤适翠华南巡叨赐御书旧德貽谋旧德者先祖之勋业也督学闻之索前案即促举行然祖父前后同宦江南先祖崇祀江宁先君崇祀宁国均隆典礼亦何幸也

官制有名似小而位甚尊职掌之事权最重者有名极清雅而品秩最卑所管之事亦极琐细烦冗者有名虽武职而专司地方事务名若文职而所司全非文翰者如侍郎名似郎官乍闻似非显职然古制已有门下侍郎凤阁侍郎爵位尊崇今六部侍郎亚尚书六卿一阶在外则为总督何其隆也典史一县尉耳何以得此佳名即列之内阁翰林院詹事府谁曰不宜乃品则未入流所管皆民间细事多吏员除授京都分五城差御史巡察所属有兵马司指挥副指挥所管皆命盗词讼诸事全与兵马指挥之名不合銮仪卫治仪正王府典仪其名亦似文职而司卤簿弓马之事升转俱属武阶相沿既久皆习焉不察矣定制官民凉帽俱戴纬纓惟雨天戴牦纓今戴牦纓者众取其便易省事且惜费耳

朝衣公服俱用补子绣仙鹤锦鸡之类分品级大小即以鸟纪官之义常见福清叶相国向高集内有钦赐大红纓丝斗牛背胸一裘背胸或即补子也如妇人之首饰曰头面半臂窄衣曰背心不然则补子二字何所取义

衣服上所织四爪者谓之蟒民间通用五爪者谓之龙非奉钦赐暨诸王赏赉不得擅用此定例也又红绒结顶之帽四面开衩之袍俱不得自制近见五爪龙四衩袍穿者愿多人少为注目即曰某王所赐无从稽考听之而已

古冠綬纓即项下绊带也有明纱帽头巾各制贵贱悬殊见诸画像传之梨园乃俱不用带今则草凉帽如箬笠皮暖帽如毡笠上加红纓而于帽檐下俱缀以带绊犹追古制古人结鞶用带太白乐府燕南壮士吴门豪一首名结鞶子张释之为王生结鞶今则冬以布装棉夏以葛装麻甚且侈以绫锦纱缎多不用带结矣古今制之不同如此

陕西以羊绒织成者谓之姑绒制绵衣取其暖也今则制为单袍纱取其轻暑服也今则制为绵袍绵褂比比皆然习以为常谚云有里者无里无里者有里意指此乎

【绒俗字本毳字音冗】

缎与革段同多贯切音段履之后帖也今厚缁通名曰缎有五丝八丝内造汉府官素平花帽缎闪缎倭缎各种花纹颜色随时变幻亦穷工极巧矣前代惟绫锦【锦：锦】绸罗刻丝衲纱之类至于缎不独未见亦未闻也近由东洋入中国者更有羽缎羽纱哔叽缎哆啰呢据云可为雨具试之终逊油衣其价甚昂亦前代所未闻者

古裘有五大裘黼裘良裘功裘裘裘大裘用黑羔皮为之王者祀天之服缁衣羔裘朝覲用之郑风云羔裘豹饰大夫燕居之服近日不独不以豹饰而大夫多不羔裘矣间或服之惟领与袖或饰貂或饰狐或饰银鼠之类而晏子一狐裘三十年疑用全狐今服全狐者少千羊之皮不如一狐之腋近之狐腋尽人而裘矣当年孟尝君之狐白裘即集狐之白腋也俗名天马皮

又集项下细毛深温黑白成文者俗名乌云豹甚暖其腿里一块黄黑杂色者集以成裘俗名麻叶子亦暖至于全白狐皮则粗冗不堪又有玄狐一种定例止准官一二品以上者制为帽上赐居多若口外严寒出差者亦准为帽虽名玄狐其实苍白色者居多也如高昌国贡唐太宗玄狐裘今亦难得苏季子黑貂裘敝古人贵重貂裘近日稍丰裕者即衣之定例四品以上始用何其僭越也若上元夫人之青毛锦裘汉武帝之吉光裘程据之雉头裘张宗

【宗：昌】昌【昌：宗】之集翠裘南昌国进浮光裘司马相如之鹔鹕裘度安之紫终裘止存其名不知为何物矣更有猓猓一种轻暖华美貂裘之外无出其右所谓胭脂雪者想即此耶侍卫制为朝衣诸王制为坐褥而定例亦四品以上始服近亦僭越矣又灰鼠一种最宜于秋末冬初及南方不甚苦寒之地迩来颇多至于毛之白者名银鼠康熙初年尚少其价甚昂近不独多而且贱矣又以獭皮为深衣可御雪可当衾裯粗而重贱者之服亦裘裘类也缁衣羔裘黄衣狐裘取其表里如一羔裘玄冠不以吊言衣冠俱黑色古之吉服也是古之羔皆用黑者而今则纯白矣何古之黑者多而今之黑者少也或曰当日之黑羔安知非如今日之染狐皮染银鼠耶为之一笑羊皮贵羔而贱老人皆知之独口外则不然有皮软而毛长者俗名麦穗子言其毛长如麦穗也口外风高非此不足以御之虽公卿贵官至彼貂裘之上亦必覆此一件取其毛大压风也内地亦有此种不如口外者佳

腰带古以革为之名曰鞶带又谓之鞶革自天子以至庶人皆用之后世用丝带以玉犀镶嵌束于丝带之上即玉带犀带也本朝按品级有嵌宝石之玉以及金银玳瑁明羊角乌角之类另制成环以软丝带贯之天潢束黄丝带觉罗束红丝带有特赐黄带者公卿以下多束蓝丝青丝带间有石青油绿织金者无甚关系守制者则束白布带皆所以分尊卑别等威也带环先用左右二块系以汗巾刀觔荷包等类即古人无所不佩之意荷包疑即夹袋也专为收藏字帖之用后增前后二块不过饰观而已又单用腹前一块带不用长穗垂下以铜铁镀鍍金银或牙骨角石之类制或【或：成】二块扣而为一此惟于春夏之褻服甚便非常服也

戴孔雀翎所以壮军威分近侍也分甘余话所载本朝侍卫皆于冠上戴孔雀翎以目晕之多寡为品之等级武臣提督及总兵官亦有赐者后文臣督抚亦或蒙赐得之者以为幸是已然总未分晰详明大清会典所定贝子戴三眼孔雀翎根缀蓝翎镇国公辅国公戴二眼孔雀翎根缀蓝翎内大臣一等二等三等侍卫入内大臣额驸前锋统领护军统领前锋参领护军参领诸王府长史一等护卫戴一眼孔雀翎根缀蓝翎贝勒府司仪长王府贝勒府二等三等护卫贝子公府护卫及护军校俱戴染蓝翎内外额驸俱不许戴诸王府散骑郎有阿达哈哈番以上世职许戴一眼孔雀翎根缀蓝翎其余虽加级不准戴再查各省驻防之将军副都统并督抚提镇蒙赐孔雀翎者止戴一眼

本朝帽制凉帽以德勒苏草细织成面者为上等次等用白草内以片金或大红缎紬各色纱缎为里名曰帽胎上覆以大红绒线纬纓王公卿大夫士庶皆戴之雨用藤织成胎上覆以茜红西牛尾拣毛为纓而皆名曰纬笠有用藤竹麦楷织成有檐出外周围者名曰台笠此贱者所戴帽以遮日色者考帽自汉以来已有之邓通之黄帽管宁之皂帽李晟之绣帽沈庆之狐皮帽即今之暖帽也今之暖帽以貂为贵次有染银鼠染黄鼠以为帽檐者贵贱皆戴至于玄狐则有阶级矣若长孙无忌之浑脱以乌羊毛为之羌服之席帽晋人之白接离皆以羊毛为

之即今之毡笠毡帽也式虽不一而帽之名则同

商丘太宰云骨董虽小事却有分别看字画经纪不如士夫看铜玉器士夫不如经纪此语诚然今以二事验之昔经纪持字画数轴求售内一轴为米元章书经纪极赞其真即坐客亦共诩不置予哂之众哗曰无论米字逼真今不能及即伯生匏庵石田所跋亦非近代手笔也予曰诸君未审耳此轴所书之诗乃国初广平申兕盟涵光铜雀怀古之作也漳南落木绕寒云野雉昏鸦魏武坟不信繁华成白草可怜歌舞囑红裙西园乱石来三国古瓦遗书认八分七十二陵空感慨至今谁说汉将军检申集示之愕然此经纪不如士夫也一故中丞张公觐之侄见贻铜器一具赠以十二金欣然而去置案上为镇纸用偶来一经纪把玩不释询其何以曰此压绣也宫中用以压彩刺绣耳予昔以此物货某中丞得重价此母是耶予颌之此士夫不如经纪也太宰洵博古矣但云字画之佳者虽黑暗处闻其气味摹其绢素即知真贋不必细看此语未免英雄欺人

生平最爱赵字式古堂所云苏黄米蔡在宋则为大家以晋人视之犹是雕虫小技惟子昂直追先辈上下五百年纵横一万里余家藏颇多自处郡回禄后尽成灰烬其后再为搜求止得前后赤壁赋二幅千字文一卷两赋于南巡时在扬州行宫进呈天颜有喜今所存者惟千字文而已陈子文太守弈禧临摹不忍释手跋后百余字

附陈子文跋 昨在黔中题文敏假山诗谢不敢而不能展观形秽至今犹媿戊子十一月朔葛庄观察出示此卷属题谢不敢而又不能遂附鄙语于后考文敏书千字文真行草各体甚多亦有见于停云及国朝法书者又六体真迹今在曹待诏秋浦处蒙赐自内府荒陋失学宝墨琳琅皆得浏览今日复玩妙迹结撰之精运用之变且有出所见之数本此与肃府旧刻笔意相似反复寻味海内之至宝也或曰贋者双钩此怀元章狡狴之心何足信哉附自记 松雪墨迹予旧多收藏惜处署祝融之后灰烬无遗为生平恨事今阅此卷回忆种种似不及此卷之妙即洛神善本式古堂取赋中语称其瓌姿艳逸王孟津跋云鸾飞蛟舞得二王机神鄙意揣摩犹觉彼肥媚而此遒劲也昆阳为东瓯末邑此卷流传民间湮没已久未经名人题跋或曰为有心者割取亦未可定余观察浙东时于无意中购之如获拱璧日夕临玩觉神采弈弈直追先晋不禁眉宇飞动固予之幸亦翰墨之幸也夫

高韦之僉事其佩留心绘事能以指头作画别开生面超越前人因赴温处观察任道出袁浦余以疋绫长二丈许必索画尽韦之笑呼童子研墨盈池以指蘸墨云飞风动转瞬而成山石木树水藻残荷禽鸟鱼蟹穷工尽致真绝技也后海宁陈子文出守南安便道见过子文书法无出其右者余以画索题子文走笔即书高画陈书洵称二妙又系原属本支无双绝艺乃出一家诚熙朝之宝物也今子文已下世矣可胜浩叹

附陈子文跋 历代以来名家既多以指为之自我弟韦之使君始人物花木禽兽草虫不假思索骈指点黠顷刻数十幅随意飞动无不绝人万象罗于心胸天地集于腕下此造化特鍾异人也在京师居相近又本宗昆季戊子仲冬赴横浦过淮壩葛庄观察索跋公诗妙擅海内涵汇淳蓄无所不有发之吟咏自足尽其变何待小言之戈戈也

刑部主事阮兄源河南祥符人余祖籍亦祥符同县同姓因以兄弟称长枕大被不异骨肉也兄性聪慧纤巧迥异常人其字怪僻自言融会诸家独成一体殊有别致画则挥洒数笔生动酷肖诗不多亦不存稿曾记邯郸道上一绝风雨邯郸道纷纷利与名黄粱知大梦千古一卢生至制作之巧赏鉴之精可称绝伦自制清烟一种商丘太宰以为在寥天一青麟髓之上又能于一笏上刻滕王阁序一篇心经一部字画崭然在内庭供奉时呈样磁数百种烧成绝佳即民间所谓御窑者是也内庭制作多出其手太皇太后加徽号龙宝暨皇贵妃宝余亲见其拨蜡送礼部非大手段能之乎所藏骨董皆人所未见之物未几卒于京皇上遣内大臣包衣昂邦奠茶酒侍卫送柩出章仪门赐金驰驿为一时光宠所惜无子制作不传骨董散失近日所用之墨及磁器木器漆器仍遵其旧式而总不知出自刘伴阮者空费一生心思呕血而终乃不得与东坡肉眉公饼并传于世悲夫

有人持玉杯质之伴阮兄曰此一捧雪也同为赏鉴兄曰玉情果美水色亦佳好玉杯则有之一捧雪恐未也余曰不知是莫太常家藏是莫成所伪造者为之一笑后据杨次也太守云乃祖雍正为少司马时曾见之气魄甚大情色俱美主人曰此真一捧雪也当于日下观之因持向墀下映日细看杯内雪片纷纷如飘拂状以是知真贋有别而命名不虚也

伴阮兄有奇石高尺余山峰透露对面可以见人山腰白石一段视之如云白石内又有青石一条如龙形头角宛然因摹入纸幅名青龙白云图悬玩不置又有蜜结伽楠长二尺厚一尺温润芬馨迥异众香雕成诸葛枕式云枕此可免小遗试之果然后俱为逃奴窃去范谈一侍讲光宗云康熙四十年侍直南书房见高丽国进人参四枝盛以漆匣精工华丽少顷内侍收进遇熊相国赐履稍为启视出语曰其形似人所谓人参也扁鹊之语诚为不谬天颜有喜谕云四十【脱年字】来止见此四枝耳

方竹产于天台山古人取以为杖雅甚相国王公掞督学两浙时试题有方竹杖歌余以台州司马摄府事走笔应之王公谬为许可诗载分体中

镌图章以青田石为佳而青田石又以洞石为第一他产不及也石俱在溪中戽干溪水乃得石块质颇燥硬止可琢瓶尊杯罍之类所谓洞者又在水石之内如石之有玉不可多得若灯光石者尤为不易予待罪括州时曾鸠工采取数月无一佳洞或曰皆为匠人窃去但地方多一土产即多一累恐贤有司亦不乐有之也

余得痔成漏有五管楚甚延袞【袞：兗】州魏老人医治早用烟熏晚用水洗俱平常痔漏药料惟上药密不示人上药之法甚妙用鹅翎管药实其中管后一孔如针大由后挤药如一线直入管中盖之以膏七日而愈

野苧荠杵碎取汁澄粉少加冰片以之点眼去翳甚效

戊午停科后余遂弃举子业同学者尚有三人查荆州嗣韩沈古培心杨钱玉友良择仍读书寒家之无倦轩荆州素怯弱余尝劝慰曰子病至此尚五夜呶唔何急功名而薄性命耶答曰

吾非不知曾梦神人示之以诗有五色云中第二名之句是以恋恋冀其一验耳后果以五经乡荐榜眼及第古培平湖人北闱不第就试浙省体肥畏热坐轿号中不能堪出场即卒于龙门外余适兼摄杭篆为之经理其丧玉友累科不第留羁京师余佐台郡时答书犹有句云人从杨柳烟中去书自桃花洞口来嗣后音问遂绝余以引见赴京遇查声山学士云久已削发为僧矣

秋闱省试内外帘官各有所司自初六至十五凡十昼夜诸务冗杂外帘之监临提调监试羣公无片刻之暇恐少懈即有舛讹惟赏月后稍安适也头场毕内帘主考率同考官传点催卷然一时誊录不及盖彼在内空闲也过中秋频频解卷内帘渐次冗忙而外帘又闲矣惟清晨开龙门各属谒见收发文牒此外一无事事由月半至月初颇觉日长似岁己卯监试浙闱中式诸君以余稍知文墨修通家之谊甚恭如查德尹嗣□高巽亭舆许莘野田盛紫翰弘邃在诸君雅意堪嘉而余则谦退未遑也

彭泽刘参政晓未遇时落拓武林徘徊湖上一日祈梦于少保庙梦少保拱手者再以米一勺置诸掌中醒来大恟以为他日必乞食也后赴广西傅将军军前招抚有功议叙补授浙江粮道始悟少保拱手者敬公祖也以米置掌中者掌粮储也

广平秀才马振古老不应试其子初入泮望中甚切除夕卜灶镜听俗所谓瓢儿卦也出见妇人亟问曰我于何年得中答曰驴子骑人那一年意以为必无之事也一日郊行见驴生驹其主负驹而归喜曰此非驴子骑人耶即售田治装赶赴秋闱振古闻子售田以为必偿赌负特借应试之名耳怒甚欲追而责之渐至良乡同试者劝止且曰今文宗大收老手君宿学曷亦一试棘闱乎振古笑而从之是科父子同榜真奇验矣诸同榜者称振古为年伯谓其子为同年也其子亦称诸同榜者为年伯谓其父为同年也一夕燕集有友笑谓曰今科乔梓定同连捷仅捷一愿在谁振古沉吟良久曰豚儿尚幼众为哄堂

测字起于观梅虽易数中小技然有奇中而名达九重者如宋谢石辈自不多遘近今卜肆亦复谈言偶中休咎立应如响姑识见闻所及者数则更足起发后人书字字请测者一审视即拱让曰是一位现任宰官在内则都察院外则按察使盖上为宪字头也但下子字属地支之初是新迁转耳恭喜必得又问地方何如答曰总在好的一边以子字为好字之半也临别其亲私问曰亦不利者乎答曰子为一了只恐此任不能迁转既而信然一人书文字问讼事测曰吝不成吝凶不成凶此事即当解矣问何日可解测曰今日何日曰十五测曰再六日必解果符所言问何以知六日也测者解曰以十五加六为廿一日昔旁加文为散是以知之入夜人来请测不及书字时己戌时即口占戌字以请问何占曰欲有谋耳测曰不可直向彼言须转一湾其谋可遂盖戌字一点转湾即为成字也一人失马来书奇字测曰必不得矣以为无马在旁则骑不成但立可耳乡试后一生书花字决去取测曰必中无疑恭喜廿七名已有人在寓报矣以花字分为立人廿七也归寓果然其人嗣后复书一字问终身测曰廿年内官可至五品问有儿子测曰三子问寿几何测曰七十之外不能八十耳细询其故以一字可加三字故生三子复加二竖乃成五字故廿年可至五品也一字二三四五六七皆用至八字则不用一横故寿至七十以外即止耳一太守书识字请测测曰文头武脚若非决狱理刑之

方面有司即属乌台兰垣之喉舌近臣应曰知府以识字与职字相类故知为官而落笔先成言字遂云然也曰今任几年应曰已任五年曰满六年便丁父艰以中有小六字一字为丁字之头曰为父象故知其丁父艰也戈属武但服阙之日不补文官而补武官殊不可解后果丁艰起复【复：服】适世职缺人乃补阿达哈哈番奇验如神但测字须矢口而出得先天之气稍加转念即落后天便不准矣

生平不喜结盟盖朋友为五伦之一朋友甚亲何用弟兄之名乎故作结交行有嗟此纷纷假弟兄五伦忘却真朋友之句忆为处州太守时僚友八人既集飞马相招至则诸君坐次序齿不序爵心窃异之年最长者扬言曰今日之会欲结异姓兄弟君意何如余唯唯因思宦途畏险一拂其意则不合时宜勉强从之至今犹悔也

仕途中交际必委用家人然最有关系盖伊给事左右窥伺意旨容易作弊为奸其于事务金帛固所不免未闻于诗文投赠亦恣肆需索者甲子予谒王新城阮亭先生以葛庄诗集呈教先生一见极口称赏自许作序见贻越月往领阁人辞以未就适先生之【之：以】宫詹奉命秩祀南海私计先生王事匆迫必无暇及此不知其脱稿已久而家人辈匿为奇货横索多金予与先生文字交若贿而得之不仅污先生之清白乎迨祀毕先生回都踵门往候入座即道前序因行急殊觉草草予谢尚未颁发先生怒诘家人随检前叙见付别后闻即重惩之矣

阮亭先生一日偶过荒斋见几上删订诗草内二疏故里一绝自批删字先生云此真唐音也何以删为七绝易于尖新最难浑成如此作句调和雅俗【俗：衍文】意味深长恐全集中未易多得宜存之诗云旷怀真足古今师七十人当致仕时更为子孙谋远大不将养老赐金遗予祖籍开封历年既久宗人多居旁邑新郑六弟又仲远来相候起居毕即讯家中安吉近况弟曰老母前患背疽得一传方服之而愈今年八十有七康健如旧又弟妇久病经闭形容枯槁殆不可活闻有荥阳张广文者能治奇疾延之诊视命服丸药渐至平复肌肉再生可称白骨回春更有奇者家居北楼上祀祖先所有薄蓄皆积于上不意为不良者窥探纠党二十余人持械燃炬排闥而入直趋楼所家人咸惊避惟听其去取而已群盗方入室登梯乃忽火炬扑灭尽行狼狈而出兽奔鸟散岂祖宗之灵为之默佑耶抑或有神焉呵护驱逐耶俱不可知独惜不能向盗者一问何所见而踉跄奔逸也此三者皆不幸之幸也予因索二方附记于后

○治发背方

用头发不拘男妇者一把入真麻油一碗将头发熬化令病人饮之则毒气渐消不致伤生

○治女子经闭形容枯槁

何首乌【半觔切片用黑豆拌九蒸九晒为末用人乳浸不计次数晒得一觔重】

怀熟地【四两】

红花【五钱酒洗】

鹿茸【五钱酥油炙】

当归【四两】

共为末用拣麦冬六觔熬膏入炼蜜少许和为丸如梧桐子大每服二钱渐加至五钱

新郑高相国文襄公拱其兄南直操江巡抚捷乡人皆称为都堂生来状貌迥异常人而举动行事有堪绝倒者自幼即遍体生毛年十八髭须满颊就童子试文宗见之笑曰汝可归家抱孙矣答云童生年实弱冠不幸须髯如戟此父母遗体耳奈之何哉试既不售归家遂去髭须戴小帽着大红袍骑马遍历街市使人前导令直呼曰不进学的高大胡子欲学状元游街岂不可羞岂不可耻从此奋志夏日就池边苇窠傍读书蚊虻小虫遍体家人辈见之劝其少息为之频加拂拭乃曰母拂为也此不上进之贱皮肤正该蚊虻作践耳勤学苦志遂连捷南宫历官大中丞南直操江巡抚莅任后适大盗反狱闻报即赤体率抚标官将兵卒往捕羣盗斂手受缚訊之何以不鬪就擒盗曰见一天神遍体如丝悬挂火焰光生心胆俱碎是以不敢动手耳盖抚军遍身赤毛每夜卧则红光罩体家人窃窥见一大猪鼾睡于傍巫者以为室火猪降生语近荒唐岂其然乎明时官制操江例当巡视各郡所至行台每责巡捕官巡捕官患之贿请于用事之家人曰无他因食不饱耳教以当如是则可邀免既住宿即如家人言呈送酒筵一席复令人抬极熟猪首一盘馒头数十枚烧酒巨瓶皆极热从抚军前过闻其馨香即问曰此何为者禀曰犒从抚军曰如此好物不敬老爷反赏下人耶令列席前手捻而食大杯倾酒顷刻俱尽方就筵而坐诸凡添换不遗余沥乃不复责巡捕矣食量之大可敌十人一日属下新任和【和：知】县禀谒少年进士服饰华美见其所戴纱帽外织马尾内炫金光彩耀目怒诘之此帽何来答曰京师新兴大怒曰我也与你个新兴命隶役杖之知县窘甚再三恳求免冠谢过方免知县忍而衔之未几行取台中特疏列款揭参时弟文襄公当国按其奏章星夜遣人至皖城令其以病请休庶可保全抚军见弟手书怒谓家人曰你相公叫我致仕难道他要做官便不许我做官么他道他宰相大就不知哥哥还大看我打得他宰相打不得他宰相如此固执文襄无奈曲全令归林下罢职后日惟与一老友象戏以自娱一日忽入内久不出老友馁甚又不可归告之家人家人禀曰某相公饥甚欲归耳不然当吃午饭矣叱曰甚【甚：吃】吃【吃：甚】午饭你叫他去吃那当头炮盖自忿屡局败北也其可发笑者甚多六弟又仲为言数则因志之寒家新郑一支与高府屡世姻娅故知之如此

本朝己未召试博学鸿才最为盛典康熙十七年正月二十三日上谕谕吏部自古一代之兴必有博学鸿儒振起文运阐发经史润色词章以备顾问著作之选朕万几时暇游心文翰思得博洽之士用资典学我朝定鼎以来崇儒重道培养人才四海之广岂无奇才硕彦学问渊

通文藻瑰丽可以追踪前哲者凡有学行兼优文词卓越之人不论已未出仕着在京三品以上及科道官员在外督抚布按各举所知朕将亲试录用其余内外各官果有真知灼见在内开送吏部在外开报于该督抚代为题荐务令虚公延访期得真才以副朕求贤右文之意尔部即通行传谕遵行特谕嗣内外荐举到京者五十九人户部给与食用十八年三月初一日除老病不能入试外应试者五十人先行赐宴后方给卷颁题璇玑玉衡赋省耕二十韵试于弘仁阁下试毕吏部收卷翰林院总封进呈御览读卷者李高阳相国霁宝坻相国立德冯益都相国溥叶掌院学士方蔼取中一等二十名二等三十名俱令纂修明史敕部议授职衔部议以有官者各照原任官衔其未仕进士举人俱给以中书之衔其贡监生员布衣俱给与翰林院待诏俱令修史其未试年老者均给司经局正字圣恩高厚再敕部议部覆奉旨邵吴远授为侍读汤斌李来泰施闰章吴元龙授为侍讲彭孙遹张烈汪霏乔莱王项龄陆棻钱中谐袁佑汪琬沈珩米汉雯黄与坚李铠沈筠周庆曾方象瑛钱金甫曹禾授为编修倪灿李因笃秦松龄周清原陈维崧徐嘉炎冯勛汪楫朱彝尊丘象随潘耒徐鉉尤侗范必英崔如岳张鸿烈李澄中庞垿毛奇龄吴任臣陈鸿绩曹宜溥毛升芳黎騫高咏龙燮严绳孙授为检讨俱入翰林其年迈回籍者杜越傅山王方谷朱鍾仁申维翰王嗣槐邓汉仪王昊孙枝蔚俱授内阁中书舍人猗欬休哉抡才之典于斯为盛其中人材德业理学政治文章词翰品行事功无不悉备洵足表彰廊庙矜式后儒可以无惭鸿博不负圣明之鉴拔诚一代伟观也而最恬退者李检讨因笃于甫授官日旋陈情终养上如其请命下即归更能遂其初志无如好憎之口不揣曲直或多宿怨或挟私心或自媿才学之不及而生嫉妬或因己之未与荐举而肆蜚语一时呼为野翰林其讥以诗曰自古文章推李杜【高阳相国霁宝坻相国立德】

而今李杜亦稀奇叶公蒙懂遭龙吓【掌院学士方蔼】冯妇痴呆被虎欺

【益都相国溥】宿构零骈衡玉赋失粘落韵省耕诗若教此辈来修史胜国君臣也皱眉又纂赵钱孙李周吴郑王为灶前生李周吴阵亡笑谈更属轻薄故不附入

○附李检讨奏疏

奏为微臣母老多病独子万难远离泣血陈情吁恩归养事臣窃惟幼学而壮行者人臣之盛节辞荣而乞养者人子之苦心故求贤虽有国之经而教孝实人伦之本伏蒙皇上敕谕内外诸臣保举学行兼优之人比有内阁学士兼礼部侍郎臣项景襄臣李天馥大理寺少卿臣张云翼等旁采虚声先后以臣因笃姓名联尘荐牍获奉俞旨吏部遵行陕西督抚促臣应诏赴京臣自念臣母年踰七旬属岁多病又缘避寇坠马左股撞伤昼夜呻吟久成废疾困顿床褥转侧须人臣止一弟因材从幼过继于臣叔曾祖家分奉小宗之祀臣年四十有九儿女并无母子茕茕相依为命躬亲扶侍跬步难离随经具呈哀辞次第移咨吏部吏部谓咨内三人其中称亲援病恐有推诿一概驳回窃思己病或可为【为：伪】言亲老岂容假借臣虽极愚不肖讵忍借口所生指为推卸之端痛思臣母迟暮之年不幸身婴残疾臣若贪承恩诏背母远行必致倚门倚闾夙病增剧况衰龄七十久困扶床輶路三千难通嗾指一旦祷北辰而已远回西景以无期万一有为子所不忍言者则毛义之捧檄不逮其亲温峤之绝裾自忘其母风木之悲何及餅壘之耻奚偿即臣永为名教罪人亏子职而负圣朝非臣愚之所敢出也皇

上方敬事两宫聿隆孝治细如草木咸被矜容自能弘锡类之仁推于士庶宁忍孑然母子饮泣向隅夺其乌鸟私情置之仕路盖阁臣去臣最远故以虚誉采臣而不知臣之有老亲也臣云翼与臣皆秦人虽所居里闲非远知臣有老母而不知其既病且衰委顿支离至于此极也即部臣推诿之语概指三人而言非谓臣当必舍其亲而不之顾也且臣虽言前陋而同时荐臣者皆朝廷大臣其于君亲出处之义闻之熟矣如臣猎名违母则其始进已乖不惟渎戮天伦无颜以对皇上而循陔负疚躁进贻讥则于荐臣诸臣亦为有面目去岁台司郡邑络绎遣人催臣长行急若风火臣趋朝之限虽迫于戴星而问寝之私倍悬于爱日然呼天莫应号泣就途志绪荒迷如堕云雾低头转瞬辄见臣母在前寝食俱忘肝肠迸裂其不可渎官常而干禄位也明矣况皇上至圣至仁以尧舜之道治天下敦伦厚俗远迈前朝而臣甘违离老亲致伤风化有臣如此安所用之乃臣自抵都以来屡次具呈具疏九重严邃情壅上闻随于三月初一日扶病考试蒙皇上拔之前列奉旨授臣翰林院检讨与臣同官纂修明史闻命悚惶忝窃非分念臣衡茅下士受皇上特达之知天恩深重何忍言归但臣于去秋入京奄更十月数接家信云臣母自臣远离膝下哀痛弥侵昼夜思臣流涕无已双目昏眊垂至失明臣仰图报君俯迫谗母欲留不可欲去未能瞻望阙庭进退维谷乃于五月二十一日具呈吏部未蒙代题臣孺切下情惟有哀祈君父查见行事例凡在京官员门无以次人丁听其终养臣身为独子与例正符伏愿皇上特沛恩慈许臣遄归抚养其母叨沐圣泽以终天年臣母残病余生统由再造不惟臣母子衔环镂骨誓竭毕生而报国方长策名有日益图力酬知遇务展涓埃矣

李笠翁渔一代词客也著述甚伙有传奇十种闲情偶寄无声戏肉蒲团各书造意剗词皆极尖新沈宫詹绎堂先生评曰聪明过于学问洵知言也但所至携红牙一部尽选秦女吴娃未免放诞风流昔寓京师颜其旅馆之额曰贱者居有好事者戏颜其对门曰良者居盖笠翁所题本自谦而谑者则讥所携也然所辑诗韵颇佳其一家言所载诗词及史断等类亦别具手眼

闯贼李自成入人皆知因祖坟被掘泄气而败然知掘坟者为米脂令边长白大绶而不知设计用智皆门子贾焕成之也虽长白自纪虎口余生亦多隐约其词未若长白之侄淮南边别驾声威向予言之历历如绘当闯贼猖獗时其兄李自祥改姓张自祥仍为县役其意有在一日令方坐堂视事有一人赴诉卖蒜为兵所抢令命至堂穷讯其人匍匐膝前阳作哀诉阴以手按令足令解其意带至后堂卖蒜者请屏左右乃脱帽裂缝出封函曰吾寔内监此密旨也令拜读乃命掘闯贼祖坟之诏旨随挥之出升堂伪偿其值而遣之然闯贼祖坟寔难寻问又系密旨不敢声张其时闯贼逆焰已炽令忧形于色寝食俱废门子贾焕令素所亲信者乘闲请曰窃见日来形色举止大异往常是有大忧郁而不能解者曷不见告或可効犬马乎令察其言词恳笃且自念舍此无可告者遂详吐前事焕曰事未可骤图也今在官捕快张自祥者本李姓闯贼亲兄而县役某某等二十人皆插血结盟兄弟共约贼兵一至即为内应焕实二十人之一也今欲知彼祖墓须与自祥结纳可徐察之诘旦传祥入内宅笑问曰尔本姓李何以易张彼方置辩焕出谓曰吾已细陈底里不必遮掩令曳之起曰时事已不可为天意有在尔辈皆应时豪杰予身家方赖保全何必相瞞遂偕焕结拜出则官役入则弟兄久之乘醉托言

素晓堪舆叩其墓所形势自祥乃以出猎为名邀之同往尽知其所在越数日闻贼兵将犯潼关令出七千金付自祥先行投款军前吾俟入关后即至尽遣其所好十余人以附行卫其辎重祥去令偕焕并家人潜往伐墓墓上有大树一株紫藤垂满掘至棺藤根包裹千匝以巨斧砍断其藤棺开有小白蛇一头角已成龙形止一眼其身尚未变遍尸皆长黄白毛二三四寸不等枯骨血润如生随并蛇斫碎而焚之扬灰讫考剖棺之日适闯贼兵败河南一目为流矢所中噫何天意人事符应之速耶墓掘毕觅焕不得令甚惊惧多日焕至令询何往焕曰恐自祥有疑复回则当另图他计某特送出潼关令彼心安乃敢归耳此地不可久居乘今闯贼新败纵有报闻力不暇及公已为朝廷立此大功可谓不负君命胡不挂印归山乎嗟乎焕一贱役小人耳何用心淳挚乃尔耶令遂弃官焕亦他遁越数年长白闲住京师之绒线胡同忽有一僧白发苍颜诣门求见县令边公有侄亦新选县令出见之僧曰非也欲见前任米脂公耳长白出僧即跪哭长白讶其为谁僧曰公忘贾焕耶乃相持而泣因向侄追述前事曰主与吾岂非明朝暗里之忠臣乎后世其谁知之长白固留不可与之金不受为制衣装一痛而别不知所终有明失国一丐者题诗于壁云三百年来养士朝一朝丧乱竟皆逃纲常留在卑田院乞丐羞存命一条赴水而死惜其姓名不传甲寅闯变浙东温州总兵官祖某潜已通款一日伏甲于资福山之大观亭集众官议饷巡道陈公丹赤永嘉令马公瑛皆在坐逆将厉声挑衅云兵饷不前士尽饥馁抄陈道家足以给饷有巡道夜不收即夜捕手林义者挺身前曰尔欲抄吾道家岂非反耶遽扶公出逆将大喝小人何敢如此林曰吾小心中惟知有道主道主心中惟知有朝廷不似尔享高官厚禄早已顺贼一心惟知有贼也逆将愈怒挥甲士寸磔之二公不屈皆遇害后邑人立祠祀两公庑下设林义像被皂服两目瞠视至今凛凛有生气余观察温处拜陈忠毅公祠赋七言诗五章其二三云东瓯观察拥专城牙纛空存不掌兵元帅逆谋先士卒【谓祖总兵】贤侯同志又书生

【永嘉令马公瑛陕西孝廉同遇难加赠大参】大观亭暗天无色资福山摇地有声

【俱公被害处今于此处建祠】曾几何时归一死留芳遗臭两传名朝廷何负汝干城早竖降旗引寇兵达士报君能尽节小人为主不偷生【夜不收林义扶公大骂同时被害】璧分尺寸同贞性钟用洪纤总发声海内羣公谁作传双忠名后附伊名盖纪其实也余载葛庄分体中之三人者下役也彼门子丐者夜不收非素娴诗书礼义之人而其忠君报主之心或见于事功或托诸题咏或慷慨杀身名虽不彰至其成仁则一以视反颜事仇偷息人世其相去为何如也当时未有表而出之者故志之

明洪武建都江宁改为应天府称直隶及永乐迁都北平改为北京曰顺天府江宁改为南京曰应天府称顺天为北直隶应天为南直隶本朝定鼎顺天仍其旧称盖京有南北者明南京亦置部院群臣以洪武旧都命名也今版图已无南北之分应天既改江宁府亦何南京之有乎既无南京又何北京之有顺天应称京师京都为是无奈道路传呼日讹一日即士大夫亦习焉不察可为谬误之甚

凤阳为有明始兴之地凡府属土著之人向人自称不曰敝乡敝处敝府而曰贵乡贵处贵府更不少为谦逊今已渐无矣

辽东人自署多称三韩非也晋书韩有三种一曰马韩二曰辰韩三曰弁韩马韩为高丽辰韩

为扶余弁韩为新罗皆东方外国汉传亦谓三韩各在山海间地方合四千余里东西以海为限即古之辰国也又唐太常张卿求仙得幸少陵以诗讽之首云方丈三韩外昆仑万国西考蓬莱方丈瀛洲海中三神山也方丈在东海中央四面相去正等方丈许【许：计】五千里盖方丈昆仑秦皇汉武求仙处也诗意以为秦皇之求方丈汉武之穷昆仑皆阔绝不可致之事岂如张卿奉使求符往而遂获乎可见三韩外云者指极远边地为言而辽东乃汉晋时内地乌得以三韩称之

●在园杂志卷二

华光殿宴联句余韵

题屈原祠

徐州使院

内宴应制

题齐山翠微亭

滴牙山

普安道中

入緬取贼早发金沙江

军回

寄泾州守李宏

蝇

梅子

塔顶

题壁

登石门驿新城眺望

盘山绝顶

度梅岭

挽薛养呆

悯黎吟三之一

山亭纳凉

宫女叹

和徐东滨

感兴

答草池约泛蓉溪

放舟行

望忠州

游西林庵

平乌刺江

春日游西苑

西苑宫词

送周虚岩归吴

听秀上人弹琴

吴门夜泊

月夜同刘天山作

郑司马入塞歌

旅怀

夜坐见白发寄别朱仲开张瓿江

高邮赠龚山人

泊京口望金山寺

题杨法部容闲阁

写山水

题画赠姜明府

送张伯淳还关中

送王谏北上

吹笛怀友

岁暮客居呈焦弱侯

邵武舟次

禹碑行

山中蚤秋

江心寺除夜

客中立秋

闽关旅夜

维扬谒文信公祠

过蓟州

追怀宜黄大司马谭公

元夕宿泉州洛阳桥

送戚都护

塞外烧荒行有云

花朝

赋得匡庐山

送仲弟南还兼怀老亲

李金宪招饮黄鹤楼

显灵宫

宋漫堂太宰萃筠廊偶笔载曹蜂仪云闯贼陷京师有中州士人被掠者言昔破某邑与一士人共住一大家楼下时当暮春雨中对酒联句首唱云风风雨雨送春归忽闻楼上续一句无雨无风春亦归两人默然拱听徐云蜀鸟啼残花影瘦吴蚕食罢柘阴稀嘴边黄浅莺儿嫩颌下红深燕子肥独有道人归不得杖头常挂一蓑衣两人登楼视之绝无人踪惟飞尘盈寸而已列朝诗亦载是诗与此小异再稽历朝诗云正德间五羊赵克宽为建安学谕尝与朋辈郊游作送春诗俱用风雨字旁有丐者负莎衣立和一首问之不答而去诗云怨风怨雨总皆非风雨不来春也归蜀魄啼残椿树老吴蚕吃了柘阴稀墙头红烂梅争熟口角黄干燕学飞自是欲归归未得肩头犹挂一莎衣余合二者考之当以列朝为是律诗无一韵迭用二句之体花影瘦莺儿嫩不合春深中四句一样切脚尤犯诗病既已为鬼何事独称道人且欲何归乎结处散漫全无着落不若列朝诗所存有源有委句调高老诗既合拍事亦近人

集唐最难对偶工切语意联贯惟朱竹垞彝尊诗综内所载者佳句甚多如

去日渐多来日少

别时容易见时难他生未卜此生休

桂岭瘴来云似墨

蜀江风淡水如罗

风尘荏苒音书绝

人物萧条市井空

眼前好恶那能定

梦里输赢总不真

千里关山千里梦

一番风雨一番啼

惨惨凄凄仍滴滴

霏霏拂拂又迢迢

佳节每从愁里过

远书忽向病中开

举世尽从愁里老

暮年初信梦中忙

故国山川皆梦寐

昔年亲友半雕零

嗜酒何妨陶靖节

能诗重见谢玄晖

坐牵蕉叶题诗句

醉折花枝当酒筹

过桥树叶村边合

隔岸柴门竹里开

鸟啼云窦仙岩静

树入天台石路新

杨柳亭台凝晚翠

芙蓉帐幕扇秋红

天上吹笙王子晋

云边度曲许飞琼

石窗花落春归处

山店灯残梦到时

好梦肯随蝴蝶去

离魂暗逐杜鹃飞

红树暗藏殷浩宅

青山空绕仲宣楼

碧落有情空怅望

春山无伴独相求白云何处更相期

啼鸟歇时山寂寂

寒鸦飞尽水悠悠

归鸟各寻芳树去

寒潮惟带夕阳还

劝君更尽一杯酒

与尔同消万古愁

梁间燕子闻长叹

楼上花枝笑独眠

自愿勤劳甘百战

莫将成败论三分

世态炎凉随节序

人情反复似波澜

五千里外三年客

一寸心中万斛愁

鸟下绿芜秦苑夕

云凝碧树汉宫秋

衰草斜阳江上路

渔歌樵唱水边村

朝云暮雨连天暗

野草闲花满地愁

兰亭旧路曾相识

子夜新歌遂不传

天长地久有时尽

物在人亡无见期

自叹马卿常带病

何曾宋玉解招魂

千树桃花万年药

半池秋水一房山

中郎有女谁堪托

伯道无儿最可怜

千里云山何处好

十年书剑总堪悲

波生野水雁初落

风静寒塘花正开

独坐黄昏是如【是如：谁是】伴

每逢佳节倍思亲

共说陈琳工奏记

焉知李广不封侯

萧何只解追韩信

贾谊何须吊屈平

料得也应怜宋玉

不知何处吊湘君

能将忙事成闲事

不薄今人爱古人

阁中帝子今何在

河上仙翁去不回

滕王高阁临江渚

汉主离宫接露台

壶觞须就陶彭泽

勋业终归马伏波

以上皆极自然放翁所云火龙黼黻手非补缀百家衣者比也近复有集陶集杜者皆不能自然巧合

门神诗甚多如纷纷后辈催前辈济济新官换旧官之类惟唐实君考功孙华一联云将军自昔名当户【自注李广孙名】丞相于今亦抱关【自注出萧望之传】精切博雅一时传诵

豆腐诗惟查编修夏重慎行有顾名原合腐儒餐之句甚佳又一日入侍上幸海子捕鱼赐羣臣命赋谢恩诗编修结句云笠檐蓑袂平生梦臣本烟波一钓徒词意称旨忽奉内传烟波钓徒查翰林盖同时有声山学士故以诗分别之足见圣心嘉尚一时以为幸可与春城无处不飞花韩翃同一佳话

孟翰林端士亮揆先聘张守戎之女张官云南兵戈阻隔音问不通及孟贯【贯：贵】遂结婚世族末期年滇省荡平先聘复至不能却谢乃分宅而居张美而端善文翰尤工诗世族之女祖父兄弟皆贵显孟厚世族而薄单寒张氏所居屡月仅一至焉张赋秋闺怨八首内云落落秋风班女扇团团明月窦家机其诗偏传孟不少悔忽传旨孟亮揆行止不端着革职一时快之

朝鲜使臣至京贺万寿有一联云河清适际千年一嵩寿齐呼万岁三莫谓异国遂无奇才

朝鲜女郎许景樊八岁赋广寒宫玉楼上梁文此又外属之女神童也惜其文不传尤侍讲展成侗戏为补之见西堂杂俎

明末一大老教子弟勿作古诗恐坏人心术或闻笑曰沈休文始创四声当为君子第一但不知何以处渊明余以为陶靖节当年尚未有近体耳至李唐诗人无近体者甚多岂尽小人耶近世又鄙近体云开手便作七言律其人可知矣则君子小人又何称焉

九言诗起于高贵乡公不独作者甚少知者见者亦少杨升庵梅花一律云元冬小春十月微阳回绿萼梅蕊早傍南枝开折赠未寄陆凯陇头去相思忽到卢同窗下来歌残水调沈珠明月浦舞破山香碎玉凌风台错恨高楼三弄叫云笛无奈二十四番花信催不过存此一格恐难得佳也

古人才深似海胆大于天故命意造句咸出人意表然亦有平中见奇为今人不敢道亦不肯道者如李德新之东西南北人用夫子成语犹可也若古诗鱼戏荷叶东鱼戏荷叶西鱼戏荷叶南鱼戏荷叶北四句止更四方并不叶韵杜少陵西川有杜鹃东川无杜鹃涪万无杜鹃云安有杜鹃四句一韵韩昌黎鸦鸱鸱鸱鸱连用七鸟名罗昭谏一二三四五六七连用七数目更有连用七然字五休字成句者又欲以极鄙极俗之语化为出风入雅之句为可怪也

然惟古人为之今人则不可耳雪压长林万木低经旬不共野人期蹇驴借得如黄犊犹怕山桥未敢骑此不知何人佳句粘贴桃源村舍壁上或是古作或是近诗俱未可定惜予读书不多即多亦弗能记忆耳一见赏心何其静雅谨慎之至也

漂母祠题句颇多一望皆黄茅白苇无足取者惟有一绝我携千金来但买淮阴酒平生耻受恩长揖谢漂母词意超脱不与众同但不落姓名或曰此海宁陈素庵诗为人抄袭耳

论语内无此字四书五经无真字曾经细查洵然

崽音宰北人呼小儿之不慧者楚湘沅间凡言是子者亦谓之崽囡通用俗字也

璽音问原本玉破有纹者曰璽今凡器破而未离者皆用此字言工白音诈上声与诸字有别申敬中云万历间京师有四川卫官言工白宠唱名时呼诸宠不应唱毕独留问何姓名对曰言工白宠此姓罕见存以备考馘音盖以田地租人收种年满仍退者

庋音托丈量物件两手舒平为一庋今河工多用之而此字与馘字正字通字汇皆不收

尤展成侍讲才学典丽著述传诵海内世祖章皇帝见其西厢时艺大加称赏趣召入而先帝升遐矣康熙己未试博学宏词入翰林然每自伤未由科目故于诗文常寓志云汉以策制科而班马扬雄不遇唐以诗取士而李杜浩然见遗又题钟馗像云进士也鬼也鬼也进士也一而已矣又李白登科记云你曾见那个状元会题诗来是虽一时感愤之言人皆曰不留公郎门生地乎文人落笔当从忠厚和平怨而不怒古人有以教我矣

有督学江南者待幕友薄甚羣诮之乃集四书句缩脚为诗云抛却刑于寡来看未丧斯只因三日不博得七年之半折援之以全昏请问其结句未就羣哄而笑适东君至讯知其由乃续曰且过子游子弃甲曳兵而一章皆用四支韵通押虚字亦奇构也结句更出意表少时过淮阴盐城县丞何素之之泗为余言蔡昆阳状元启傅二事一蔡公交车投刺山阳令盖同年而先仕者批其刺令阍者查明蔡拂然北上殿试及第令以厚币请罪蔡却之答以诗曰一肩行李上长安此日应怜范叔寒寄语山阳贤令尹查明好向榜头看一蔡狎一妓临别赋罗江怨调功名念风月情两般事日营营几番搅扰心难定欲待要倚翠偎红舍不得黄卷青灯玉堂金马人钦敬欲待要附凤攀龙舍不得玉貌花容芙蓉帐里恩情重怎能勾两事兼成遂功名又遂恩情三杯御酒嫦娥共彼言如此未知果否

平凉太守杨次也守知其先为邳睢河官相与辩论古今改正诗文虽僚友若窗友也贱辰二月十六日赠诗有云月当既望光才满春过平分气始和可谓清切之甚一日约効力诸君游依绿园分韵赋诗余有句胜地风云诸子会名园松柏老夫来次也向诸君曰祇觉刘公诗句持在手中都是重的

偶于友人案头见拙刻葛庄集朱批此亦出入香山剑南间而未纯者曲阜孔东塘尚任乃曰

宋人之句唐人之调余则何敢惟朱中立评苏允吉大司马诗曰格不高而气逸调不古而情真二句吾所深服余有酉时立春作内一句云春向斜阳尽处来丹徒夏庶常慎枢云此士人称公为春阳先生也

关夫子殿额多用志在春秋鄆州刘广文峒自嘲曰此四字似可移书苜蓿斋中专为吾辈而设吾无奢望惟望二丁祭得肉食耳是亦志在春秋也闻者绝倒又有谑广文一联耀武扬威带裤打门斗五板穷奢极欲连篮买豆腐三斤带裤连篮更觉形容过甚山阳司训陈求夏履端乃其年检讨维崧之子也十年来微禄不足以糊口时卖文以资不给先其年有篋衍集选子【子：予】诗若干付梓竟尔遣【遣：遗】落询之求夏曰此集刻于先人身后为人窜易稽其原本不独公诗未登今现存未刻者尚多过半拟刻篋衍续集以成先志苦于俸薄不足以供剞劂奈何

门人常近辰建极天资总敏力学工诗余以一札勉之覆书云捧诵手谕宛如侍立左右亲聆教言但建极自受业门墙矢心惕厉惟恐入于小成有辜大教无如天分低微终难上达又兼三四年来自浮萍断梗讲论无人未免自以为是所谓差以毫厘失之千里者矣昨细读批示拙作如梦初醒今后更当多读多作多改细心体察不但不敢有负指教亦断不肯自安于卑近也披阅之下足见其服膺好学深可嘉尚当此年力富强时能虚怀如此其后又何量焉

○附原书

仆与足下订交有年会必谈诗别必寄诗外人见之莫不曰此二诗人也然足下数年前之诗与今日之诗无异殊为惜之何也写景不过陈陈相因几字数言而已写情不过碌碌无奇肤词习句而已求炼一超脱之意出一惊人之语成一俊逸之篇不易得也如此虽再过十年再成千首亦何益哉向见吊孙七古一篇可称杰作以为手笔开展自有进境孰知此后仍寥寥焉以足下英敏之资灵秀之笔何忍安于卑近然非读古学古不可也老生常谈辄曰选体汉魏六朝初盛此岂易言哉不过好高务远者之夸示于人耳扼要之法但取与我性情相近者如唐之钱刘香山宋之后村石湖剑南明之季迪茶陵推而广之如宋之永嘉四灵元之虞扬范揭明之前后七子选其集中之最者熟读而玩味揣摩而讨论之即不能苦心探索亦当采择而涉猎之痛谢熟径尽去窠巢三五月后郁勃而出奋笔疾书眼前意中自然清真当必有过人者矣要知古人言景言情不能出于云泉花月觞咏狂愁之外我能化腐为新点铁成金即足名家兼能传世耳此足下对症之药也

燕赵道上有石碑勒子路宿处土人名其地曰石门拙作有僻地得先贤一宿传千古之句据圣裔博士孔东塘云石门在曲阜北四十里登泰山必由之地子路卞人卞城在石门东南四十里子路之齐之鲁道经石门故宿焉观晨门之问子路之对皆乡邻语故知非他国之石门也天下石门有十余处或山名或地名独此石门乃齐郑盟会之所见于春秋为最古也孔东

塘向余云石门山峯秀拔林木郁葱杜工部陪刘九法曹郑瑕丘石门宴集诗云秋水清无底萧然净客心掾曹乘逸兴鞍马到荒林能吏逢联璧华筵直一金晚来横吹好泓下亦龙吟欲于此建一秋水亭君当任之余随庀材鸠工以成此役与春山馆相对春山馆者在山之南麓即张氏隐居也张氏字叔明鲁国诸生为竹溪六逸之一杜子美访之有春山无伴独相求之句秋水春山可称绝对

○附东塘书

石门山者诗人社集之所也夫子开其端李杜承其绪而我两人遥遥相对一席不散岂可滥入邪派混我吟坛修葺之举似不宜更让他人也记石门胜迹甚伙惟秋水亭为全山冠冕工宜亟举况山中建造不须高大在有力者为之如编一鹤笼耳竹木选就凿枘合成一水盈盈载至兗郡距山纔七十五里耳弃舟登车至彼合架不日之工新亭成矣开名山之生面成敞里之奇观先生之风山高水长孰得而泯没也独念我两人年逾周甲事须早就不但乘时可可为亦须亲眼见之亲身享之弟经营四十年仅能种树千章并未加一绚一茅今得先生慨然任秋水亭之役其余春山馆晚兴楼何敢重烦物力但续续商略或有会料得天下贤者必无一部葛庄集镇此石门者相须殷相遇疏固其宜耳

○附孔东塘建秋水亭记

石门山形如蟠龙前有台曰颌珠幽谷之水所由泻也石骨多窍水之渟者深不测夏秋间常喷腥雾疑有蛰龙土人呼为龙泓祷雨辄应泓上石基平旷能收全山之胜唐杜子美陪刘九法曹郑瑕丘宴集于此后之游人临水濯缨多咏杜诗惜无片石可扪把茅可憩耳予每来必步此基慨焉永叹穆然长思欲构小亭而刻诗于壁一以栖前哲之灵一以迟后贤之驾区画三十年而榛莽如故但乞郑簠书一秋水亭额携之行篋展玩而已嘻老矣甲午冬薄游淮南得遇在园观察语及石门之胜且叹亭之未建而诗之未刻也在园毅然曰此诗人事也肯让予为予何幸也即日选材命匠不浹旬而亭与碑成矣即日舟载北来不浹旬而翼然临于龙泓之上矣千年缺事一旦补之予把酒落成觉峰峦溪涧莫不趋赴此席宾客丝竹无非湊泊此诗所谓颌珠台者有此亭与碑非真龙颌之珠乎异日者在园先生莅我东土过石门而览胜迹予也追陪宴集倡予和汝必有名篇雅什辉映石门当不似刘九法曹郑瑕丘仅费华筵之一金而甘以秋水八句让子美也康熙乙未三月云亭山人孔尚任喜而记之

见近日布衣寒士专以傲慢荐绅为是细考其抱负行止全然傲慢不起真是井蛙观天近日后生小子专以指摘前辈为能细扣其学问见识全然指摘不着真是蚍蜉撼树此辈不独可笑实可哀已

吴人吕文兆熊三十年旧交也性情孤冷举止怪僻一夕席间吕举一令各诵鬼诗如下有百年人长眠不觉晓自怜长夜客泉路以为家寒食何人奠一卮骷髅戴土生春草自去自来人不知归时惟对空山月西山一梦何年觉明月堂前不见人之类余后举明人焰口诗有身无首知是谁寒风偏射刀伤处吕拍案叫绝以为驾长吉而上之好尚如此其人可知先年所衍女仙外史百回亦荒唐怪诞而平生之学问心事皆寄托于此年近古稀足迹半天下卒无所遇近以陆伯生蔡九霞纂辑广与记止详注各府而略州县不足备参考乃编成续广舆记颇为详明以卷帙浩汗尚未能付梓

佟图南世京才人而有气节者也平昔以诗酒为缘循循儒雅绝无窘乏之状即诗亦无寒乞语不意一病不起卒后无以为殓惟敝衣数件质票数纸而已故余挽诗云高品能孤立英才未一伸开箱无长物至死不言贫与杨次也太守比屋而居挽诗云士品最难穷里见分灯从不借邻光太守感余诗内有有名虽县令其实乃诗人之句遂题曰诗人佟图南之墓友人常定远为之勒珉

余诗将进酒直用太白一杯一杯复一杯句刻成悔之门人尹半檐颖慧曰古人诗有直用古人者柳色黄金嫩梨花白雪香阴铿句而太白直用之有用古人句而增字佳者水田飞白鹭夏木啭黄鹂李嘉佑句而王右丞加以漠漠阴阴遂夺为己有更有直用己句者许仰晦一尊酒尽青山暮千里书回碧树秋一见于京口闲居寄两都亲友再见于郊园秋日寄洛中故人有今人直用古人之句者如王新城先生渔洋集怀人诗道予问讯今何如与道甫问讯今何如同直用少陵不少嫌也况所用太白成句非出色佳构不过平率无奇者若欲抄袭何取乎此识者自当知之

余诗童去自埋生后火饭来还掩读残书或谓直抄放翁然陆句呼童不应自生火待饭未来还读书余变其意非直抄也

刑部王主事鏊善诙谐行二面麻由外城入署至椿树胡同见男妇鬪殴众拥难前兀坐小轿中成打油诗一律人心天理偶然差哄起张家与李家一脚飞来头有血两拳挥去口无牙纓冠往救亏三嫂袖手旁观是二麻乱挽青丝呼好打明朝必定到官衙闻者无不绝倒一时喧传都下因达大内后王转员外郎引见时侍卫诸君齐指曰此即袖手旁观之王二麻也

董甥起裕请问曰古人单词词组脍炙千古如空梁落燕泥池塘生春草云中辨江树枫落吴江冷微云淡河汉疏雨滴梧桐之类此人人共知者近见阮亭先生所称两止修竹间夜深流萤至果幽静绝伦至大江流汉水孤艇接残春二句反复思索不得其佳处何也答曰新城天资学力非比常人所取皆最上乘必格韵高妙方可入眼吾辈初学人自当循序渐进登高自卑为是绚烂之极归于平淡未能绚烂而先平淡恐涉画虎不成之病孤艇残春句不必思索工力若到自能知之莫疑为英雄欺人语明季一富户有二婿一已为守备一尚是儒生富户轻生重备后备历升副总兵任边上生联捷南宫以御史差巡九边过其境副总披执郊迎夜带兵马拥护五鼓副总亲为传报稟请阅操生于枕上赋一绝云黄草坡前万甲兵碧纱帐里一书生而今始信文章贵卧听元戎报五更

陈健夫于王诗名颇着与检讨其年通谱雅善其年篋衍集选刻其诗然才而僻合己者胶漆稍违趋向则冰炭矣为诗宗杜故近体多五言性豪诗酒不乐仕进类晋人之放诞使其检束身心努力经济功名正未可量况汉军比诸汉人出身稍捷而汉军同辈者仕多华膺健夫虽遨游所至延接甚欢然垂三十年终于韦布甲午夏过予袁浦征歌文燕把杯索扇立成三绝以赠小部之佳丽者未几北返近晤曲阜孔东塘知其卒于东鲁殡于友室悲夫

陕川总制大司马孟公乔芳为开国元勋亦清廉第一世祖皇帝念其功懋给以世袭阿达哈哈番其长君自幼丧明圣恩准其承袭俸禄照常支給虽盲其目能聪于耳通文翰善应对且能诗每于稠人坐中闻声即辨某人一日遇诸涂余于马上问起居即答曰刘世翁好违教将两月矣同行者俱愕然且每会必问近日有佳作否试为诵之入耳心通颇知句之美恶其自着累累成帙最得意者写怀五律二十首犹记腹联云一官惭报国十载羡归田余亦清通

施侍讲愚山先生闰章家居先君任宛陵时甚为莫逆戊午先君见背己未先生以中堂交荐博学宏词赴召入都过余赐第亲至先君神主前拜毕痛哭设座对主谈曰老公祖久别不复相见矣治弟本期终老林泉公曾劝余出山坚执未从今一旦再入长安究竟学何曾博词何能宏抚心滋愧不独无面对公未免为猿鹤所笑耳谬承圣恩叨授词林实无报称行将归矣非负知我也有应召二律请为公诵之可以鉴予心矣犹记一联云黄阁怜知己青山解笑人诵毕以刻笺焚于主前再拜又哭复拱曰公郎少年锐志于学其诗清真不落浮响予敢不以前辈自居相期有成乎此即所以报公之万一也娓娓多言正容恭敬俨然生人面谈童仆多窃笑之然前辈于交情知己死生不为少变愈见古道焉

边桂岩别驾声威性癖挝鼓尤妙渔阳三弄今时无二手也自言传诸旧内宦然仅得大旨耳至摹拟尽致皆从心会闻其初学时起居坐卧饮食寤寐惟鼓是念每常对客两手动摇作掺挝状自亦不知也与余同官袁浦间一试之穷数十刻之力方尽其妙予为赋挝鼓词三十二韵嗟乎正平后千古传心桂岩一人而已桂岩亦忧失传思得愿学者授之而卒无一能师其艺者真绝技也

○附挝鼓词

春光一奏柳杏妍秋风再奏叶盘旋【明皇自制春光好秋风高二曲】孰能上夺天公权临轩纵击鼓渊渊羣音之长推鼓先万物和气赖以宣劈空制造感圣贤后人沿习乐便便寻常冬冬杂管弦未若今日掺挝全中庭饮罢撤绮筵有客解衣耸双肩接挝到手屡变迁初犹散漫继缠绵忽惊霹雳下遥天金戈铁马捣中坚须臾檐溜雨连连众语嘈切满市廛有如长林断续蝉有如落盘珍珠联并将双挝暂弃捐用爪用指用老拳最后一通更轰阗河流入海汇百川耳根莫辨声万千坠石一声方寂然座客改容叹有缘醉者以醒病者痊渔阳绝技谁能专淮阴别驾三韩边愿君之寿如偓佺不尔其后恐失传【别驾祖籍高丽】

天许楼燕集诵古诗为下酒物欲各搜从来武人之能诗者或纪全篇或采警句亦吟坛胜事也坐中陈求夏履端杨次也守知吴吉人蔼尹半檐颖慧梁简臣天眷王若士肱吴谦侯邦亨陈朗行玕纪异三曾撰陆紫函大奇费厚蕃锡琮董大甥起裕大孙永弑二孙永鑽三孙永锡咸欣然而应有独诵一首者有连记一人数首者有诵其警句或警联者有能诵长篇偶忘一二句而他人补之者有三四人共记一首更有上下讹错别后检查改正补到者皆附录之以时代叙先后独明诗为最多然一时兴会所至亦不足以尽武人之诗也

○梁曹景宗

华光殿宴联句余韵

去时儿女悲归来笳鼓竞试问行路人何如霍去病

○唐洪州将军

题屈原祠

行客漫斟三酌酒大夫原是独醒人

○雁门郡王王智兴

徐州使院

江南花柳从君咏塞北烟尘我【我：独】独【独：我】知

○宋左千牛上将军曹翰

内宴应制

三十年前学六韬英名尝得预时髦曾因国难披金甲不为家贫卖宝刀臂健尚嫌弓力软眼
明犹识阵云高庭前昨夜秋风起羞见团花旧战袍

○岳武穆王

题齐山翠微亭

经年尘土满征衣得得寻芳上翠微好水好山观未足马蹄催送月明归

○明定襄伯郭登武定侯英诸孙也有联珠集

滴牙山

险瘴南来独滴牙天分蛮獠与中华万盘山绕一丝路百丈峰开千叶花毒雾瘴烟相映霭鸟
声人语共咿呀停骖每劳征南士莫听啼猿苦忆家

○普安道中

竹暗藤荒路欲迷一重山度一重溪枯槎偃蹇如人立蛮语侏离似鸟啼花底雨晴飞蛱蝶水
边冬暖见虹霓祇应风味堪题处三寸黄柑压树低

○入緬取贼早发金沙江

征帆如箭鼓声齐舟渡金沙更向西石栈夜添蛮雨滑晓江晴压瘴云低水边乌鬼迎人起竹
里青猿望客啼又隔滇阳几千里桐花榕叶晚凄凄

○军回

两行旌旆引鸣笳万骑宵严不敢哗
隔岸水声冲石响罩山云脚受风斜
孤邨月落时闻犬古塞春残不见花
归骑莫嫌征路滑凉风吹雨洒尘沙

○寄泾州守李宏

泾阳太守如相问更比来时白发多

○蝇

苦不自量何种类玉阶金殿也飞来

○梅子

莫倚调羹全待汝世间还有皱眉人

○塔顶

不知眼界高多少地上行人似冻蝇

○参将汤引绩

题壁

战酣日落阵云开百骑难当万马来
血污游魂归不得幽冥空筑望乡台

○戚武毅公继光止止堂集

登石门驿新城眺望

万壑千山到此宽城边极目望长安平居自许捐躯易遥制从来报国难尚有二毛惊岁变偶闻百舌送春寒庙堂只恐开边衅疏草空教午夜看

○盘山绝顶

霜角一声草木哀云头对起石门开朔风鹵酒不成醉落叶归鸦无数来但使雕戈销杀气未妨白发老边才勒名峰上吾谁与故李将军舞剑台

○度梅岭

溪流百折绕青山短发秋风夕照闲身入玉门犹是梦复从天末出梅关

○俞武襄公大猷正气堂集

挽薛养呆

伐木风不还今古几心知我与君结契相期弱冠时平生一然诺盛衰永不移我善君相助我过君相规嗟君忽奄逝一老不赀遗昔为暂离别今作长相思戚戚重戚戚良朋今有谁

○万都督表号鹿园居士玩鹿亭稿

悯黎吟三之一

虎兕来犹可奔狼师一来人无存大征纵杀玉石焚昔人雕剿只一村雕剿功成赏不厚大征

荫子还荫孙杀一不辜尚勿为何况万骨多冤魂

○山亭纳凉

一亭梧竹里迥出市尘间石径缘萝入江峯对座闲海云朝屡变山鸟暮双还别去衡茅下思君懒闭关

○宫女叹

莫向云屏羨阿娇暂将清泪度春宵带围自此拚长减待得君王爱细腰

○刘指挥使锐春台集

和徐东滨

何处幽栖好城西有茂林山来当户翠竹长隔墙阴哺子飞梁燕窥鱼下水禽闭门无所事赤日任流金

○余参将承恩鹤池集

感兴

白日沈西陆返景流东岑端居屏尘翳欣然理鸣琴大雅金不悦驰情在郑音违俗信靡合安可同荒淫达人宜止足嘉遯我所堪富贵苟非我一唾麾千金

○答草池约泛蓉溪

春来花鸟总关情夜雨愁听不到明怪杀主人犹病酒晴江鼓柁放舟行

○放舟行

芙蓉溪水三尺强苍苍两岸花草香若待长江新涨合撑舟直上小茅堂

○望忠州

高江落日片帆秋岸上鱼罾次第收无数峰峦云雾里舟师指点认忠州

○张都督通

游西林庵

野寺萧条一径微山僧相见语禅机云深石洞玄猿伏烟锁松林白鹤归上界疏钟通碧落边城鼓角送斜晖浮生自觉浑无定欲解鸣珂问钓矶

○周京营都督于德

平乌刺江

春搜马迹遍南荒彝獠新降罢画疆绝壑危岩通鸟道飞旌迭鼓遶羊肠黔泸东下归辰浦箐砦西来接夜郎王化远行铜柱外炎州万里尽梯航

○张指挥元凯伐檀集

春日游西苑

宣室临西苑灵台对籍田宫莺迷绿雨厩马饮清川柳引金堤直松含玉殿圆先皇受厘处寂寞锁春烟

○西苑宫词

九献不须歌旧曲词臣昨已撰芝房大官不进麒麟脯御饌惟供五色芝水旱恐烦祠后土未央深处好祈年朱衣擎出高元殿先赐分宜白发臣拜舞不同郊社礼科仪一一圣人裁进来白鹿高于马驯扰金阶不畏人

○李千户元昭岫崦山房集

送周虚岩归吴

返棹岁将晏离亭酒共斟岛云寒没影江日冻生阴莫惜飘蓬迹应伤折柳心丘中别同调聊复理鸣琴

○黄参将乔栋

听秀上人弹琴

高僧理鸣琴古调盈人耳涛生松下风龙起钵中水听罢犹泠然月出疏篁里

○张右都督如兰功狗集

吴门夜泊

帆影初抽落日斜江桥风涌太湖沙行人莫上苏台望无复吴王苑里花

○狄参将从夏

月夜同刘天山作

孤馆寒灯夜相看听晚笳清宵醒客梦明月落梅花碧海潮声急清霜雁影斜不堪怜岁暮况
复是天涯

○袁守备应黻

郑司马入塞歌

十载筹边鬓欲秋玉门生入未封侯君王岂惜师中命尚有山阴十六州

○奚百户汝嘉

旅怀

十日雨初霁一年春已残苔痕蚀径滑草色酿阴寒昔悔从军易今悲作客难殊方有桃李能
得几回看

○陈百户鹤海樵集

夜坐见白发寄别朱仲开张瓯江

坐久北风起江声带远沙客愁初到鬓乡梦不离家林静无残叶灯寒有落花怀君夜难寐别
绪转如麻

○高邮赠龚山人

近苦江东水转怜淮北居入秋尝白稻留客鲙青鱼树栅春收犊穿潮夜灌渠期君结乡社同
着养生书

○泊京口望金山寺

南徐一片石千古柱中流绕树开僧舍缘空结梵楼疏灯明水底落月挂潮头向晚禅钟起风
吹到客舟

○题杨法部容闲阁

阁傍江城外窗开云水间祇因尘境远自觉主人闲日落见归鸟月明看远山移船候潮至相
送野僧还

○写山水

夜来风雨恶落叶打柴关晓起敞溪阁乱云犹在山

○题画赠姜明府

暮云春树路千重雪后看山到处同夜永灯寒无过客月明江色满楼中

○送张伯淳还关中

怜君独棹渡黄河西北山川入雍多料得到家春未至马蹄半在雪中过

○送王谏北上

东去春潮到驿门半江风雨近黄昏由来知己难为别不是殷懃恋酒尊

○吹笛怀友

玉笛横吹入夜分中天华月度流云苕川两岸春风起飞尽梅花不见君

○外摘佳句如

近海潮通郡连山瘴入楼山川留别夜风雪望乡人孤月长随棹寒潮自到门绕庐松叶暗穿竹水声齐明月几家好故人今夜俱

床下鸣蛩偏入夜风前白苧不宜秋风尘会面犹难卜世事伤心只自知细雨残灯歧路酒清江红叶寺门舟薄游两见鴈归塞多病却憎花满楼高士远栖沧海曲好山多近永嘉场山深倦鹊犹依树风定飞萤忽上楼

○陈游击将军第寄心集

岁暮客居呈焦弱侯

仲尼本周流忽发归与叹意在就六经匪为思乡串嗟我老无闻托兴游汗漫邈想古通人反侧常宵半秣陵一君子少小登道岸嗜学自性成羲易旦夕翫近得从之谈悦上中天观诗书数千载立语穷真贗欣然遂忘家何知有岁晏

○邵武舟次

樵川泛轻舟青山起当面薄雾频往还奇峰互隐见滩滩若峻坂下下如飞箭秋容西楚同人语南方变茂树杂村烟澄溪胜江练始知溯洄艰转喜随流便对景持一杯幔亭未足羨

○禹碑行

岳麓神禹碑何年镌刻之真迹虽莫窥字体殊玮奇俨如冠冕之独立矫若凤鸟之来仪或盼而连目或耸而并肩或展而双足或握而两拳神藏蕴蓄意骋蹁跹既非鸟迹之蹒跚亦非垂露之涓涓篆隶八分抑又邈焉计历年之既久何点画之新妍岂鬼神之默护故岁久而弥鲜据译读之恍惚未必当日之真传余过长沙弗觉偶至湘潭返船直肩舆而迅步遂冒雨而陟巔喜胸襟之豁涤独坐翫而弗旋昔韩退之尝千搜而万索至咨嗟而涕涟予实迷途之未远无亦此生之宿缘

○山中蚤秋

春夏讵能几凄凄白露还秋容先到草客意未离山石鼠窥禾去清蝉抱树闲人生衣食外焉用苦间关

○江心寺除夜

偶过江心寺何期又岁除百年俱逆旅信宿即吾庐岸隔遥呼酒厨寒剩煮鱼客游随处好鬓发任萧疏

○客中立秋

蒸湿前朝雨凄凉今夜风秋声先蟋蟀露气到梧桐顿觉絺衣薄尤怜旅橐空潞河问舟楫明月向吴中

○闽关旅夜

已是吾乡土离家尚十程疏窗通野色孤枕傍松声摇落秋难赋悲歌夜不平仆夫催晓发烧烛待鸡鸣

○维扬谒文信公祠

万死艰难地千秋伏腊新山河终破国天地已成仁江橘南中像岩松雪后春徘徊歌正气不觉泪沾巾

○过蓟州

燕京八千里复作蓟门行剩有溪山兴能忘沙塞情朔风摧短草寒月近长城流涕二三策何人似贾生

○追怀宜黄大司马谭公

昔年飘泊入燕京制府怜才意不轻献策独过司马署分符旋赴蓟州营祇夸相国知韩信无复功臣妬贾生秋草春风今日泪不堪回首楚江城

○元夕宿泉州洛阳桥

春风又渡洛阳桥柳色青青伴寂寥回首故园今夜月满江灯火上寒潮

○送戚都护

辕门遗爱满幽燕不见烽烟十六年谁把旌旗移岭表黄童白叟哭天边

○塞外烧荒行有云

年年至后罢防贼出塞烧荒滦水北枯根朽草纵火焚来春突骑饥无食

又云

隆庆二载谭戚来文武调和费心力从前弊政顿扫除台城兵器重修饰迄今一十五年间
间阎鸡犬获宁息谭今已死戚复南边境危疑虑叵测患难易共安乐难念之壮士摧颜色论者
不引今昔观纷纷搜摘臣滋惑

○临淮侯李太保言恭青莲阁贝叶斋游燕诸集

花朝

二月寒犹峭燕山雪未消春来无草色病里又花朝鸿雁乡书断关河旅梦遥武陵溪上约今
已负渔樵

○赋得匡庐山

匡庐凌碧落青磴与尘分湖海远还见雷霆低不闻石门鸣宿雨瀑布湿流云独有山人屐常
随飞鸟羣

○送仲弟南还兼怀老亲

无限离愁匹马前况多风雨断鸿边板舆未得归潘岳春草何堪送惠连伏枕梦回沧海月登
临望极白云天飘零若见高堂问双鬓休言异昔年

○李金宪招饮黄鹤楼

胜地惭非作赋才清尊今向大江开当年黄鹤云中去何处梅花笛里来风卷潮声喧岛屿日
斜帆影上楼台相逢俱是他乡客衰草涔阳漫复哀

○显灵宫

先帝祈灵太乙祠重来空忆翠华旗殿中香火仪犹具海上仙人事转疑客与方书闲指画老来诗律旧心思调高身健惭时辈杰阁凭阑眼故迟

○王总戎钺

金缕且歌新乐府铁衣休话旧军功

聂晋人先吴人才学颇富手眼亦高但性情冷僻吕文兆狂士犹呼之曰聂怪其为人可知矣己巳游武林选刻西湖三太守诗太守为谁魏苍石麟征苏小眉良嗣以予三摄杭州亦滥厕名其中二公才人也予何敢并列焉晋人行时予适病中赋诗话别云□共□□□画船锦塘秋水六桥烟担囊竟去君何急伏枕偏当我未痊两地云山劳一梦他时风雨忆今年若逢同学人相问酒胆诗肠近索然周少司空蓉湖清原毘陵旧家素贫攻苦力学博极羣书不以窘迫自介有拂意事处之澹如曾祈梦于忠肃公祠公延之上坐礼甚恭临别谓曰你的事在我我的事在你己未召试博学鸿词授检讨纂修明史及后督学浙江道出毘陵先是内家官侍御其连襟则进士中翰也每司空至侍御宅皆从左右门自为出入独中翰至则开中门迎送今司空一旦登翰苑典文衡而侍御且郊迎不暇何况中门司空乃步行往谒仍从侧门而入侍御固请不从其中翰侍御皆随从侧门入焉其不以贵自骄如此抵浙拜忠肃公祠既悟优礼之不谬益知我的事在你者盖明史中于传出司空手笔也丁卯典试山东次日揭晓元卷尚不惬意隐几假寐见一猴跳跃而前司空遽以剑击之猴入箱而没大叫惊醒同事者问之遂详以告乃自解曰猴者猿也猿元同声剑为金刀明日为辰今日卯日母乃姓刘者合中元乎启箱果于落卷中检得刘瑛卷大快心赏遂定为元榜出东省有知人之颂焉

倪永清匡世选诗最四集可为富矣人各前一小传后一小跋意不重复句不雷同适如其人洵一代高手也惜其龙鱼溷淆间亦有出于永清窠臼以代成其名者盖名士多穷藉此卖文自给为贫所使情亦可原然还来比比皆然抑不独一永清也永清闲情逸韵有林下风多髯善饮人以倪髯称之倪亦自呼曰髯与予交有年矣戊子来浦上相留盘桓者匝月时表甥宛陵郡丞郭见斋遣人来迎予送以诗曰华发苍髯古逸民生平足迹半红尘搜罗海内千秋叶寄托杯中百岁身帆挂大江风力劲袂分小浦月痕新敬亭山有吾甥在好去相逢淡以亲未一年忽闻作古人矣不禁为之黯然

壬辰冬大雪友人数辈围炉小酌客有惠以说铃丛书者予曰此即古之所谓小说也小说至今日滥觞极矣几与六经史函相埒但鄙秽不堪寓目者居多盖小说之名虽同而古今之别则相去天渊自汉魏晋唐宋元明以来不下数百家皆文辞典雅有纪其各代之帝畧官制朝

政宫帙上而天文下而輿土人物岁时禽鱼花卉边塞外国释道神鬼仙妖怪异或合或分或详或略或列传或行纪或举大纲或陈琐细或短章数语或连篇成帙用佐正史之未备统曰历朝小说读之可以索幽隐考正误助词藻之丽华资谈锋之锐利更可以畅行文之奇正而得叙事之法焉降而至于四大奇书则专事稗官取一人一事为主宰旁及支引累百卷或数十卷者如水浒本施耐庵所著一百八人人各一传性情面貌装束举止俨有一人跳跃纸上天下最难写者英雄而各传则各色英雄也天下更难写者英雄美人而其中二三传则别样英雄别样美人也串插连贯各具机杼真是写生妙手金圣叹加以句读字断分评总批觉成异样花团锦簇文字以梁山泊一梦结局不添蛇足深得剪裁之妙虽才大如海然所尊尚者贼盗未免与史迁游侠列传之意相同再则三国演义演义者本有其事而添设敷演非无中生有者比也蜀吴魏三分鼎足依年次序虽不能体春秋正统之义亦不肯效陈寿之徇私偏侧中间叙述曲折不乖正史但桃园结义战阵回合不脱稗官窠臼杭永年一仿圣叹笔意批之似属效顰然亦有开生面处较之西游实处多于虚处盖西游为证道之书丘长春借说金丹奥旨以心猿意马为根本而五众以配五行平空结构是一蜃楼海市耳此中妙理可意会不可言传所谓语言文字仅得其形似者也乃汪憺漪从而刻画美人唐突西子其批注处大半摸索皮毛即通书之太极无极何能一语道破耶若深切人情世务无如金瓶梅真称奇书欲要止淫以淫说法欲要破迷引迷入悟其中家常日用应酬世务奸诈贪狡诸恶皆作果报昭然而文心细如牛毛茧丝凡写一人始终口吻酷肖到底掩卷读之但道数语便能默会为何人结构铺张针线缜密一字不漏又岂寻常笔墨可到者哉彭城张竹坡为之先总大纲次则逐卷逐段分注批点可以继武圣叹是惩是劝一目了然惜其年不永歿后将刊板抵偿夙逋于汪苍孚苍孚举火焚之故海内传者甚少嗟乎四书也以言文字诚哉奇观然亦在乎人之善读与不善读耳不善读水浒者狼戾悖逆之心生矣不善读三国者权谋狙诈之心生矣不善读西游者诡怪幻妄之心生矣欲读金瓶梅先须体认前序内云读此书而生怜悯心者菩萨也读此书而生效法心者禽兽也然今读者多肯读七十九回以前少肯读七十九回以后岂非禽兽哉近日之小说若平山冷燕情梦析风流配春柳莺玉娇梨等类佳人才子慕色慕才已出之非正犹不至于大伤风俗若玉楼春宫花报稍近淫佚与平妖传之野封神传之幻破梦史之僻皆堪捧腹至灯月圆肉蒲团野史浪史快史媚史河间传痴婆子传则流毒无尽更甚而下者宜春香质弁而钗龙阳逸史悉当斧碎枣梨遍取已印行世者尽付祖龙一炬庶快人心然而作者本寓劝惩读者每至流荡岂非不善读书之过哉天下不善读书者百倍于善读书者读而不善不如不读欲人不读不如不存康熙五十三年礼臣钦奉上谕云朕惟治天下以人心风俗为本而欲正人心厚风俗必崇尚经学而严绝非圣之书此不易之理也近见坊肆间多卖小说淫词荒唐鄙俚渎乱正理不但诱惑愚民即缙绅子弟未免游目而盬心焉败俗伤风所系非细应即通行严禁等谕九卿议奏通行直省各官现在严查禁止大哉王言煌煌纶綍臣下自当实力奉行不独矫枉一时洵可垂训万禩焉

舜之母曰握登而瞽瞍以继室生象

许由字武叔

庄周字子休

姐已姓鍾名姐字已

田文字孟【尝邑名】

孟母仇氏【音掌】

孟子周定王三十七年四月二日生即今之二月二日赧王二十六年正月十五日卒即今之十一月十五日寿八十四岁

嫪毐姓刘名伯庄【嫪毐音涝藹】

汉太上皇名煇字执嘉【煇音湍】

应制诗文内有应避字样虽不必一概不用亦须择其尤者避之考元时进贺表文触忌讳者凡一百六十七字极尽归化亡播晏徂哀奄昧驾遐仙死病苦泯没灭凶祸倾颓毁偃仆坏破晦刑伤孤坠隳服布孝短夭折灾困危乱暴虐昏迷愚老迈改替败废寢杀绝忌忧切患衰囚枉弃丧戾空陷厄艰忽除扫殡缺落典宪法奔崩摧殄陨墓槁出祭奠飧享鬼狂藏怪渐愁梦幻弊疾迁尘亢蒙隔离去辞追考板荡荒古迓师剥革睽违尸叛散惨怨克反逆害戕残偏枯眇灵幽沈埋挽升退换移暗了休罢覆吊断收诛厌讳恤罪辜愆土别逝泉陵

●在园杂志卷三

词曲莫溯朔始近则考之啸旨唐孙广谓某君授王母母授南极真人递至广成子风后啸父务光尧舜禹其说甚诞后晋孙登苏门一啸犹袭其传登仙去此道湮没不复闻矣虽有权舆正毕十五章十二法徒具空文心传无授究何益哉迨风雅变为骚赋乐府五言七言诗体化为诗余及南北词曲而填词家犹名其谱曰啸余亦存饴羊之义耳

旧弋阳腔乃一人自行歌唱原不用众人帮合但较之昆腔则多带白作曲以口滚唱为佳而每段尾声仍自收结不似今之后台众和作哟哟啰啰之声也西江弋阳腔海盐浙腔犹存古风他处绝无矣近今且变弋阳腔为四平腔京腔卫腔甚且等而下之为梆子腔乱弹腔巫娘腔琐哪腔啰啰腔矣愈趋愈卑新奇迭出终以昆腔为正音

歌曲盛于唐之梨园故今名伶人为梨园子弟然当时所歌以绝句为乐府而音律分别乃有清平调小秦王竹枝柳枝雨淋铃忆王孙伊州凉州阳关各种之异欲深考辨别杳不可得清平一调当时作者甚多惟青莲合拍此中妙解即询诸填词与善歌老白相亦莫一解也观旗亭佳话歌一绝句而龟年怀智辈以众器配之六音皆叶倾听之下不知如何抑扬顿挫也宋专事诗余歌诗之道废迨元作北曲诗余遂为定场白之前引明昆山魏良辅能喉转音声始变弋阳海盐故调为昆山腔梁伯龙填浣纱记付之王元美诗所云吴阊白面冶游儿争唱梁郎雪艳词今之昆腔是已即所谓南曲整本也元北曲每本不过四折曲皆一人始终独唱众以白间之若南曲则不独人可一出甚有一出几人分唱者至后龙子犹辈出以南北间错故有北新水令南步步娇一套北醉花阴南画眉序一套如此不可枚举后更碎割诸曲以成一曲名曰某犯或串合佳名如金络索挂梧桐之类总曰新增歌者不得不曲折以赴之亦苦道也久沿不觉习而安矣然今日人尽薄填词为容易而尊诗词为上乘黄九烟周星云诗降为词词降为曲愈趋愈下愈趋愈难尝为之语曰三仄更须分上去两平还要辨阴阳诗与词曾有是乎

何元朗评施君美幽闺出高则诚琵琶之上王元美目为好奇之过臧晋叔谓琵琶梁州序念奴娇二曲不类则诚口吻当是后人窜入王元美大不以为然津津称许不置晋叔笑曰是乌知所谓幽闺者哉以予持衡而论琵琶自高于幽闺譬之于诗琵琶杜陵也幽闺义山也比之时艺琵琶程墨也幽闺房书也琵琶语语至情天真一片曲调合拍皆极自然真是天衣无缝至于才人点染浅深浓淡何事不能岂梁州序念奴娇二曲遂谓各一手笔乎观少陵诗何法不备何态不呈乌可以一家之管见测之哉前人云郑若庸玉玦张伯起红拂以类书为传奇屠长卿昙花终折无一曲梁伯龙浣纱梅禹金玉合道白终本无一散语皆非是如此论曲似觉太苛安见类书不可填词乎兴会所至托以见意何拘定式若必泥焉则彩笔无生花之梦矣况文章幻变体裁由人公谷短奥史汉冗长各出己意何难自我作古所谓不可无一不可有二也水许多用典故未尝不与荆刘杀拜四种白描者并传又云汪伯玉南曲失之靡徐文长北曲失之鄙唯汤义仍庶几近之而失之疏然三君已臻至妙犹如此訾议诚太刻矣近今李笠翁渔十种填词洪昉思升长生殿亦大手笔各有妙处但李之宾白似多洪之曲文似冗又不知后人作何评论也

古舞法几亡今梨园舞西施者初以袖舞即胡旋也继以双手翻捧者原本之于番乐如法僧作焰口也孔东塘曰舞者声之容或象文德或象武功文则干羽揖让武则戈盾进止东阶西阶之舞所以合堂上堂下之声也古者童子舞勺盖以手作拍应其歌也成人舞象像其歌之情事也即今里巷歌儿唱连像也若杂剧扮演则又踵而真之矣惟浣纱记所演西子之舞犹存古意然亦以美人盥手照面梳妆坐卧之容以应歌拍耳至于外国旋魔等舞各像其风俗文武之容亦非离声歌而别有所为舞也

优孟衣冠取其相似也有绝不相似者如庆寿之王母则凤冠霞佩羣仙则用蟒衣小逼之卫律则补服大逼之元帅亦用蟒衣不可枚举又如追贤之韩信曲文内一事无成两鬓斑不觉皓首苍颜空熬得鬓斑斑至戏末赠金时犹不用须髯何也范少伯之后访曲文内羞杀我一事无成两鬓星亦不用须髯皆老梨园以讹传讹失于检点之故也至于副净小丑宾白多用苏州乡谈不知何本始于何年李笠翁亦深恶之极力诋毁无奈习焉不察然而副净小丑原取发科打诨以博听者之一笑苏州近地人皆通晓用之可也施于他省外郡语音尚然不解亦何发笑之有且副净小丑所扮皆下品人物独用苏州乡谈而生旦外末从无用之者何苏人自甘于为副净小丑也耶亟宜改正一大快事

元人杂剧二百五十种杨廉夫弹词有仙游梦游侠游冥游等类董解元弹词西厢王实甫师其意作北西厢传奇然董之弹词冗长太文反不若王之传奇情文兼美可歌可诵也大抵弹词元时最上一代风气使然今则竞胜传奇纵有好弦索者亦不足悦人耳目

唐张祜悖拏儿舞诗云春风南内百花时道唱梁州急遍吹揭手便拈金碗舞上皇惊笑悖拏儿今有口到喇班用小童以筋顶碗而转升高复下送葬之家亦有于前导作此戏者想亦悖拏舞之遗意耶小曲者别于昆弋大曲也在南则始于挂枝儿如贯华堂西厢所载送情人直送到丹阳路你也哭我也哭赶脚的也来哭赶脚的他哭是因何故去的不肯去哭的只管哭你两下里调情我的驴儿受了苦一变为劈破玉再变为陈垂调再变为黄鹂调始而字少句短今则累数百字矣在北则始于边关调盖因明时远戍西边之人所唱其辞雄迈其调悲壮本凉州伊州之意如云斗大黄金印天高白玉堂大丈夫豪气三千丈百万雄兵腹内藏要与皇家做个栋梁男儿当自强四海把名扬姓名儿定标在凌烟阁上明诗云三弦紧拨配夜

【夜：衍文】边关是也今则尽儿女之私靡靡之音矣再变为呀呀优呀呀优者夜

【脱夜字】游也或亦声之余韵呀呀哟如倒扳桨靛花开跌落金钱不一其类又有节节高一种节节高本曲牌名取接接高之意自宋时有之武林旧事所载元宵节乘肩小女是也今则小童立大人肩上唱各种小曲做连像所驮之人以下应上当旋即旋当转即转时其缓急而节奏之想亦当时鹧鸪柘枝之类也今日诸舞失传徒存其名乌知后日之节节高不亦今日之鹧鸪柘枝也哉

瘦词者古所谓诗谜也令人猜之以发一粲本射覆之意推而广之遂因事立名因名立格如蔡中郎题曹娥碑曰黄绢幼妇外孙齏臼乃绝妙好辞四字遂名曹娥格后述其意作曰单身机匠难织龙袍乃大红纱裙四字语句天然顿觉后来居上近且用三字叶韵矣

苏黄格本东坡山谷戏作命名如猫儿尾遇鼠则摇鼠通暑遇暑则摇乃扇也夫差兵遇越而围越通月遇月而围乃风圈也

问答格问韩信何处拜将曰筑台筑台烛台也俗谓之调侃西厢词曲曾用之

增减格一汤字谜二古人名曾点成汤一道字谜四书一句修道以仁像生格画二隶对立堂下谜西厢三句一个儿这壁一个儿那壁一递一声长吁气

蒜辣格皆鄙秽语也

调声格用诗四句不拘四五六七言如首句谜东字次句谜董字三句谜冻字四句谜读字

破损格亦用诗四句如谜废弓一张争帝图王势已空【无靶】八千兵散楚歌声【无弦】乌江不是无船渡【无稍】羞向东吴再起兵【无而】

大意包格即各谜之长者如谜桌子云观其面则方察其色则赤而有光量其身则仅二尺五寸以长问诗书颇有分问酒肉颇久尝可以居方面之位而坐镇乎雅俗可以当台臣之职而高登乎庙堂虽相君之面不过平平耳而相其大体其中立而不倚者殊足为四方之所拱向而不敢背立乎两旁如谜镜云色即是空空即是色是色是空非空非色四大部中此方清洁若非坚执定本来面目从何得小意包格即各谜之小者如谜古人名黄香不是桂花是菊花梅莲兰蕙不如他宫之奇寂寂长门有异人刘伶汉家子弟做梨园弈秋清簟疏帘方坐隐不知一叶下银床李师师童子六七人复有友五人只道三人中有一人谁知还有二千五百人太史慈翰林新造育婴堂申详准备文书报上司展禽自起开笼放白鸛公孙杵臼三世春米营生儿子不知去向谢安落花满地无人扫半夜敲门不吃惊米元章民以食为天通场第一篇百里奚二十长亭行道半小奴辛苦负诗囊张九龄学挽强弓未十年南霁云楚天雨后见明霞林逋甲乙之乡可以逃亡白乐天囊中不费一文钱赏尽清风与明月黄庭坚右军写道德经字字如金石晁错眼底桃花惊半落从前深悔念头差崔莺莺一派峰峦无限好幽禽相对更频啼冯京两人并辔入皇都梁鸿河桥有鸟独高飞冯妇生在午年午月如何不作男儿吕布梁鸿配孟光不着绮罗裳山涛千岩竞秀万壑争流岳飞挟泰山以超北海第五伦朋友之交也孟浩然三宿而后出昼又一诗谜四人者少年行云绿柳阴中点绛红杨朱奔蹄叩角闹春风司马牛少年意气真堪托季任一诺何妨缟纻通然友隐居云垂杨枝上漏春光泄柳归去来兮独擅长晋文从此尘劳方尽歇长息素丝白马为谁忙绵驹老农云中男驱犊出前邨牧仲长子摊钱送寺门孟【孟：孟】

施舍闲共儿曹相伴语告子今年齿落复生根易牙近世盛作意包知之者多故倍于他格

夹山格

夹海格

锦屏风

滑头禅以上四格名翻条子另有管见一书以字三翻而成译之殊无佳趣不若前之各格可以生发智慧快心爽目也故止存其名而已

灯谜本游戏小道不过适兴而成京师淮扬于上元灯篷用纸条预先写成悬一纸糊长棚上粘各种每格必具名曰灯社聚观多人名曰打灯虎凡难猜之格其条下亦书打得者赠某物如笔墨息香白扇之类今此风已不炽矣

酒令起于东汉擒白波贼如席卷故酒席言之以快人心是以名酒令曰卷曰【曰：白】波又曰快人心蔡宽夫诗话唐人饮酒必为令以佐欢乐诗云闲征雅令穷经史然细考唐人酒令如沈亚之令狐楚顾非熊张佑卢发姚岩杰方干李主簿李昇徐融辈所行令非不佳但皆寓诙谐讥刺或片言投合便结契好一语忤意重至杀伤性命轻亦损害功名有乖佐快人心之旨反为卷白波之争战杀伐矣乌乎可即宋东坡与客以易卦为令犹有牛僧孺父子犯罪先斩大畜后斩小畜之太露翻不如半夜生孩儿不知是亥时是子时山上有明光不知是日光是月光之巧而佳也考谰言所行用古人一名一字如纣名辛字受伊尹名挚屈原名平曾皙名点樊迟名须刘季名邦项羽名籍枚叔名乘又二名一字者张九龄字寿郑当时字庄妇人名如男子者蔡琰薛涛崔徽美人连字名者莺莺好好红红赛赛之类既有裨于风雅复又与世无侮取乐杯酒之间何其适也即马援以马革裹尸死而后已李耳以李树为姓生而知之鉏麴触槐死作木边之鬼豫让吞炭终为山下之灰仙才佳令绝无仅有然可为知者道耳使在座有一才不能敏者即生忌嫉而况才与不才者乎犹记己丑春宵宴集予有诗云两夜五更三点尽一堂二十四人欢乃举一令各说子字俱切一人如癸子瞎子秃子聋子叔子婢子兄子妹子蛮子倭子表子鸽子之类惟先圣先贤先儒帝王后妃俱不许道余无避忌其时列座文武雅俗皆能应答如响争奇角胜至令将穷之际突出一意想不到者举席大笑诚快人心次日又行食物以地得名者因戒在座食素之人不许乱及荤味犯者倍罚惟荤则无忌素如蒙山茶松萝茶武夷茶湘潭茶霍山茶阳羡茶潞酒浥酒惠泉酒易酒沧酒高邮皮酒涑酒福橘青饼关东鱼建莲太和烧固始米龙猪台鲞徽州山药安肃菜天目笋广鸭菜鸡滁鲫漆鲫固鹅镇江醋川椒胶枣高邮蛋西宁桃宣栗羌桃松江莼闽姜金华火腿之类不一而足人皆称快及行食物以人得名者如东坡肉眉公饼杨妃乳西施舌诸葛菜杜酒张梨耿饼董糖唐蹄毕肚娄包伍蛋罗酒仅得十余种题目稍难应者即少遂不若前二令之欢快也于此可见当合众心为乐不当以才自恃不独不能佐欢且或因此生怨皆不可知若举座尽属文人旗鼓相当又不可加以俗令也

西北人多强健东南人多脆弱地气使然岂禽兽亦如是耶余守处八年每民间送虎一只二只远邑送虎皮虎骨者甚多不闻某处某人为虎所伤郡志有日杀五虎记乃二大虎三小虎入城尽遭营兵鎗矢而毙家人金寿曾于缙云县夜行持红灯笼缓步山腰远望若灯三四盏就之颇近方知为虎双目惊倒山崖人与红灯辗转滚下两虎不知何物咆哮一声曳尾而奔此不独力怯更心虚矣

东坡云养猫以捕鼠不可以无鼠而养不捕之猫蓄犬以防奸不可以无奸而蓄不吠之犬庠陵罗景纶谓不捕犹可也不捕鼠而捕鸡则甚矣不吠犹可也不吠盗而吠主则甚矣疾视正人必欲尽击去之非捕鸡乎委心权要使天子孤立非吠主乎予按徐州产鼠一种较鼠形差小遇猫则以嘴扭其鼻猫伏不能动是以下犯上矣大逆不道可与梟獍同科

壬午闱中监试副者南赣徐副使櫪中秋后无事闲谈赣州有小人国之小人急差人取到其人高二尺六寸耳目俱瘦小假父仗此为生往来看者给以钱米呼其假父曰爹见官长即屈一膝曰老爷安此假父教之者声音类鸟雀不甚了了一应水火饮食之类假父能辨之据云泛海商人带至者今十二年矣时主考侍御刘豹南子章睨视良久曰一团阴气信为外国人也

幼时闻前辈闲谈蒙古中力大者无如把都鲁张京师煤车一马前导一骡驾辕两马左右骖盛行时张于车后只手挽住四骑步不能移又与友人戏友负檐柱而蹲张拔檐柱以足踏其襟塞柱脚下友苦口乞求仍将柱拔起襟始出屋瓦不为稍动张亦不面赤气喘又与力之稍次者戏张只手挽次者之腰带张前曳次后却带忽中断两人俱跌为之大笑王府前石狮子少有歪邪张左右摆设如持一砖块然使正而后已

扈护卫坦从其至戚任所携千金装归京师为剽者觐知四骑踪迹或前或后得隙便剽劫之晚投客邸店门相对仅隔一街护卫见四人诧异心甚恐谓其亲随王达官曰彼非善类将不利于吾盖知王勇而捷足以了之也王曰诺当善驱之乃持银巨锭直入四人寓呼其店主人曰吾寓中无大剪敢借一用主人见其汹汹状不敢不与王以银付主人剪逾时不稍动王笑曰何懦也以银入剪口持向己胫骨上两击而银开眉不稍皱四人吐舌惊惧逸去护卫闻汾阳有名妓至其地欲一物色之妓为豪者独霸等闲不得出护卫计赂其鸨母私载之来妓方与护卫饮狎豪者窃知之纠此方素能鬪者十数人入其寓欲生夺妓而辱护卫声哄户外妓大泣曰奈何害我王曰无恐吾视若辈如拉朽耳出户诸来者棍棒交下王先以左臂承之皆辟易其右臂亦然既而以脚拨其下众皆随脚而倒尽披靡奔散王亦不追阖户而寝妓谓护卫曰明晨必大兴复仇之举矣王笑而不答诘旦一妇年可廿七八娉娉婷婷而入护卫之寓曰昨者为谁乃敢败吾诸弟子耶王视之私行自忖此娘子军亦能复仇耶应声而出曰惟某妇曰他不足怪独此下一路乃吾家秘传不轻示人汝从何得之汝师为谁王曰吾师某某妇闻大恸哭失声既而曰此吾叔也叔无嗣恐失传故传吾昨诸弟子言其状吾不信有此今果然乎遂与王约比势观者如堵走数十回环手足作势各不相下点首称善乃互拜结为异姓兄妹而别

漕运总督屈公进美前为广西抚军先君谪南宁司马时曾为属下后回京先祖治席相邀一到先设猪首一熟鹅一慢首廿个食完然后入席诸客尚在拱让而此公之十二器中已荡然无余矣夜深复以方物侑酒屈大言此物只可塞牙缝更进鸡子三十枚始散

提学刘副使公琬琰时同官豫章招集僚友见正席外旁列三几皆陈列酒器大小毕具中有最大一瓢可容十升予笑曰此盛酒罍非饮酒杯也公琬曰君未见饮此巨觥也耶谚云主不

吃客不饮吾请先自饮以博诸君一粲立呼酒至满此瓢两手捧饮座客皆立视时优人正演西厢杂剧亦惊骇停拍未几徐徐而尽其扮红娘者所持折迭扇不觉坠地吹合诸人咸住箫管公琬置瓢几上无异未饮时予曰君复能饮此瓢乎公琬曰吾今为主宴客当留量相陪乌可先醉予曰今日如此痛饮明日尚能再饮不作病酒状乎公琬曰君知千里马乎今日而千里矣倘明日足茧不能千里是乌得名千里马耶饮酒亦若是耳此言虽小可以喻大

孔子貌似阳虎今人亦有面目相似者湖北董开府国兴与浙江赵藩司良璧相似俱旗籍人西川王观察瑛与松江芮别驾钰相似俱宝坻人诸公与寒家俱有瓜葛乍见颇觉恍惚细认方知为某某

先君与刘公斗曹公邦同为部属一日并马而行曹向刘曰君马何其肥也两股真如柳斗刘笑曰可恨他近来不食草料只啃槽帮相与大笑可为雅谑刘后为浙闽总制曹降阜城知县

善戏谑兮不为虐兮卫人美武公之诗也戏谑上古已有苟能善焉斯不为虐耳宗黄老者尚清谈弄文翰者事滑稽大率寓谑浪于风雅者居多是亦一善也逮至后世有君命臣相谑者长孙无忌嘲欧阳询曰耸膊成山字埋肩不出头谁令麟阁上画此一猕猴询应声答曰缩头连背暖漫裆畏肚寒祇缘心浑浑所以面团团太宗笑曰询殊不畏皇后闻耶有以姓相谑者尤延之为太常卿杨诚斋为秘书监一日尤诵一句属杨对曰杨氏为我诚斋答曰尤物移人又狄梁公戏同官卢献曰足下配马乃作驴卢曰中劈明公乃成二犬狄曰狄字犬傍火也卢曰犬边有火是煮熟的狗有以身体形像相谑者虞僧儒许灵长俞瞻白偶集俞多髯许秃头时有辣梨之谑许嘲俞曰胡子贩松毛终朝卖嘴俞未及答虞遽代应曰辣梨种芋苻镇日埋头又两人一长一短长嘲短曰居乌在方寸之木足以有容也或从其小体必也射乎短嘲长曰死之日无所取材工师得大木以为能胜其任也及至葬壤地褊小举而委之于壑鱼鳖不可胜食也有以名相谑者方千里与张更生共饮方举令戏曰古人是刘更生今人是张更生手执一卷金刚经问尔是胎生卵生湿生化生张答曰古人是马千里今人是方千里手执一卷刑法志问尔是三千二千里一千里有以集书缩脚嘲人者嘲阙唇曰多闻疑多见殆吾犹及史之君子于其所不知盖嘲聋耳曰见在田飞在天时乘六以御天确乎其不可拔潜嘲一老翁绰号土地曰入其疆辟入其疆芜诸侯之宝三敌人之所欲者吾嘲一文士名达曰在邦必在家必小人下不成章不皆用经书成语而未句尤奇有僧俗相谑者东坡戏佛印曰时闻啄木鸟疑是打门僧鸟宿池边树僧敲月下门古人以鸟对僧自有深意佛印笑曰所以老僧得对学士有兄弟相谑者韩浦韩洎能为文洎常轻浦曰吾兄为文如绳枢草舍聊蔽风雨而已予之文造五凤楼手也浦闻作诗寄洎曰十样鸾笺出益州寄来新自浣花头老兄得此全无用助尔添修五凤楼有兄妹相谑者东坡嘲小妹云莲步未移香阁内额头先到画堂前妹答云满面不知口何处忽听毛里一声雷有夫妇相戏者秦少游乔妆戏小妹云愿小姐身如药树百病不生小妹答曰任道人口吐莲花半文无舍此皆戏谑之善者也明时竟有父子戏谑者一父进士官太守致仕家居其子孝廉谒选得某郡别驾父诫之曰尔素诙谐利口伤人今居官矣须痛改焉子揖而对曰堂翁吩咐得极是晚生领教是子戏其父矣更有父为宰辅子尚诸生一日父至书馆子他出问馆童知子为狭邪之游乃书其壁曰昨日柳巷今日花街焚膏继晷秀才秀才子归见之即写一笺达其父昨日暴雨今日狂风阴阳燮理相公相公

是子諷其父矣又一老儒有二子长诸生次孝廉父与次弈长从旁观局老儒曰此非秀才家所为之事长慚甚弃家入山寺读书二年亦膺乡荐榜下其父已卒归来一痛后抚棺大言曰何不少待对坐下一盘棋也好是子诘其父矣戏之与諷与诘俱不可并记之以为文人之戒

明末浙东冯宦曾为某省抚军予告家居适遭国变城破登楼欲投缳尽节其子及家人环遶而泣遂偷生投顺其后愧悔悲号不食三月而卒僥死于三月之前岂不完名全节此子陷亲于不义可为大不孝家人亦不忠也先岳李公迎春为广西方伯同城孙延龄反其妇孔四贞即定南王之女逼李公使降李公骂不绝口欲拔佩刀自刎家人邵六再三劝阻且曰阳为从顺以待天兵可也李公为其所愚后孙孔夫妇疑公两端遂被害此邵六陷主不义真为可恨所以大丈夫临大节贵能自决不为人所移

广平冀公治如锡年五十无子夫人妬而有才素不孕不惟不容纳妾即婢子必择奇丑者公治无奈亦甘心听之矣其弟如珪有三子欲以一嗣公治悉以所晰家产并历任宦囊咸付其弟董理而弟妇忻忻以为得计更逆料兄嫂之无他也初公治由司道内升京卿便道抵家将进都治备仪物以足馈遗属其弟检点盖历任所得羡余久已续运于家矣其弟与妇在室私语夫人偶过窗外闻弟妇詈其夫曰礼物何须过多此皆已到我手之物好留我的子孙受享又与老绝户何为夫人骇然自言老绝户一语实伤我心泣暗下隐而不发趋公治束装先赴京卿任行后夫人乃诣村庄遍觅女之丰厚强壮者得五人亲送至京公治方与客叶戏闻夫人至大惊叶半堕地急见夫人曰胡为乎来夫人曰吾为君送妾来也此居湫隘亟易之乃出金为税大宅而居公治喜出望外不解其故然亦不敢问也夫人乃详审五女癸水之期以次第侍寝其不侍者留伴夫人未期年皆受孕逾岁生子二女三又期年生二子未几历进秩兵部左侍郎夫人辞归公治苦留不得乃曰君留二子一女以娱朝夕吾携二子二女归家且与二叔算帐耳始明言所以娶妾之故为老绝户一语也抵家悉以曩寄如珪产业宦橐按籍取赵如珪夫妇方悔失言后如珪三子皆殇竟绝嗣转得公治之子嗣之信乎存心不善神鬼共殛之

四川己酉乡试后孝廉数人结伴公交车过陕境内一少年留宿狭邪以假银给之次日北上自觉于心不安入闾恍惚见妓不终场而罢归途复经前处邻人告曰自君行后妓以银付鸨母母识假银怒而扑之身无完肤妓泣曰命薄至此何以生为夜即投缳死矣孝廉闻之不胜愧悔后拣选县令未任而殁人以为薄幸之报云

妓女无良人尽知之至其肆恶设骗未闻有果报者秦妓莺娇与一太学生狎往来甚密娇许盐商从良行有日矣生尚未知娇过生寓给曰有急需贷君四两五钱三日即偿或荐寝或奉赵决不愆期生即如数付之不知娇之诳已也越期不至往询之业已从商远扬生付之一笑而已年余生夜梦娇衣红衣腰系白巾蹙容前拜曰来偿君债惊醒天曙家僮报曰栅中牛产一犊生心动往视犊浑身赤色环腰白毛一线生颌之后生出游二年归问犊何在家人曰主母已售之矣闻价若干曰四两五钱生悚然明告家人始末传之远近骇人听闻可见设心诳骗虽下贱如娼妓犹不可为况其它乎

某侍御乡居一日赴友招薄暮归家遇市儿醉立中途从者令少避市儿怒曰吾与若桑梓也曷避为从者叱之市儿大怒秽言肆詈侍御令舆者纾道速归市儿随其舆且行且詈逮至门侍御令阖者亟扃其户市儿持瓦砾击门而詈邻人见之力劝始去从者跪请于侍御曰彼小人敢犯若此请送诸官以法治之侍御曰彼非詈我也从者曰彼且直呼名焉侍御曰世岂无同名者乎一笑而罢次日遣其子若弟诣市儿家曲致殷懃为谢罪状越日复以酒肉遗之未期年市儿以殴人致罪问死下狱侍御复令人赍酒食于狱中视之市儿大呼曰某公杀我狱吏及卒惊询其故市儿曰曩者予以酒后犯公公于是时以官法处我我当知惧惧而悔焉岂有今日公乃不加责而反慰惠交至予以公尚如此他何惧哉是以益肆无忌殴人致死则今日之死谓非公之杀我而谁与噫优容盛德也不加责而纵成其恶则过矣传曰多行不义必自毙又曰无庸将自及故书曰克诛其心也此市儿之死侍御克之也君子之待小人优容可也优容而克之不可也

甘忠果公文焜以云贵总督进京陛见时吴逆反情已露特命回滇过邯郸先君为广平太守接见其四公子随甘行公云闻公有四女贤淑与此子结为婚姻何如先君答曰俟定乱复命后议未迟也甘公淳恳再三即取鱼袋中钦赐金钁一枝为定先君归向宾客曰此兵器也乌可为聘恐儿女俱非佳兆三桂反甘公率四公子同尽节于吉祥寺而四妹不久亦亡人服先君先见之明云

二孙永鑣随其父母暂寓涿鹿有贵公子求亲佟府者拉之陪往佟公夫妇一见永鑣曰此真吾壻也不愿贵公子即商之垓儿夫妇垓云上有尊长未敢自专且如贵公子何一日垓妇他往过佟府佟夫人拥之入拉谓其女曰此尔姑也亟拜见垓妇见佟女端庄幽静爱之遂驰报老母老母曰此天缘非人谋正俗云爱亲作亲者是也即烦亲友作合今则夫妇和好儿女成行矣此事颇类传奇附记之先外祖马勤僖公之先以大司马大中丞总制三边陝川居官清正严明一时倚重但性情稍偏未免失之于刻卒后恩赐祭葬荫一子入监因乏嗣有辜盛典先后螟蛉二子亦各无后人以为奇堪輿家言此必卜葬于绝地也即如禅和家埋骨不吉其门徒亦不能继何况大人此说更属荒唐然居官或刻则有伤天和亦所忌也

张遂宁先生鹏翮以宫保尚书总督河道驻淮安清江浦行署之西有大方池莲最盛忽开并蒂数茎莲房颇大先生宴集僚属赋诗写图以纪其事时封翁太先生在署年正八旬先生与夫人结发齐眉介弟三人二公子暨孙辈俱欢聚一堂人以为佳兆云先生为予荐师其不称夫子而称先生者先生教以当如是也

遂宁先生平生极敬关夫子极慕诸葛武侯之人品学问关帝集有志书二本武侯集有忠武志八册俱考订详明可法可传总河行署川堂后有厅事三楹南面供奉关帝像旁周将军持刀侍立西面设几案遂宁先生端坐办理公务幕中无一友一应案牒俱系亲裁有时集寮属商略稍有私曲即拱手曰关夫子在上监察无遗岂敢徇隐间有以密语干渎者即曰周将军刀锋甚利尔独不惧耶

江西观察韩敬一象起署中牡丹九月上旬大放数朵不减春时惟叶不甚茂耳同事诸公分

韵赋诗宴集者十日敬一性喜繁华而不能久且暮年无子人亦以为先兆云

余守括州时十二月下旬杂花作蕊梅花盛开立春诗有插瓶花影一蜂过之句同人以为太蚤岂知四方风气不同无足为异至温州十月小春桃花杜鹃山凹如火则蚤而又蚤矣

武林梅花最盛惟西溪更为幽绝小河曲邃仅容两小舟并行舟可五六人一坐宾客一载酒具茶灶深极处香风习习落英沾人衣袂所持酒盏茶瓯中飘入香雪沁人齿颊觉姑苏元墓邓尉犹当让一头地也种花人本为射利而爱花人各具性情春光成就能两得之抵岸有一道院院中古梅二株不知其几何年矣一红一白枝干交互屈曲盘错亦莫辨其何树为红何树为白横枝如磴可以登陟予上至颠则树顶广阔平衍上设竹榻一具予乃趺坐高卧清味透人肌骨别是一番境界真香国也

绣球一名雪球一名玉团旧皆木本大树近以通洋自洋载至中国者名洋绣球草本也其花初放小蕊黄色成球始白将败则紫开最长久惟畏日耳截枝插地避阴易活

烟草名淡巴菰见于分甘余话而新城又本之姚旅露书产吕宋关外人相传本于高丽国其妃死国王哭之恸夜梦妃告曰冢生一卉名曰烟草细言其状采之焙干以火燃之而吸其烟则可止悲亦忘忧之类也王如言采得遂传其种今则遍天下皆有矣其在外国者名发丝在闽者名建烟最佳者名盖露各因地得名如石马余塘浦城济宁干丝油丝有以香拌入者名香烟以兰花子拌入者名兰花烟至各州县本地无名者甚多始犹间有吸之者而此日之黄童白叟闺帟妇女无不吸之十居其八且时刻不能离矣谚云开门七件事今且增烟而八矣更有鼻烟一种以烟杂香物花露研细末嗅入鼻中可以驱寒冷治头眩开鼻塞毋烦烟火其品高逸然不似烟草之广且众也

门人尹半檐在商丘宋太宰座次人有以宝石呈售者太宰命别真贋半檐取视太宰哂曰辨琥珀用鼻辨宝石用舌盖宝原从石出尚具锋棱其性带凉舌口舐便觉不似假者之温而滑也予旋命取试信然又大家闺阁欲试珠之真假贯之以线真者一泻无停假者颇涩迟迟方下以真者质重而假则质轻耳志之亦可为博古者一助

京城西便门外二十里诸葛庄南土人名姥姥坟乃明朝葬宫人处也冢固累累碑亦林立文皆奉皇太后或皇后懿旨谕祭翼圣夫人或赞圣夫人奉圣夫人之类文更典雅皆出司礼监太监手笔守坟老妪尚能言其所以每于风雨之夜或现形或作声幽魂不散余题诗有莫怨当时恩厚薄十三陵上亦斜阳之句地震后碑俱倒仆将来自化为乌有矣

余守处郡赴杭值季时制府王公□廉使卞公永誉于十二月廿七日获海贼九十八名即日申明入告廉使传予同审臬署即岳武穆王旧宅也堂庑高峻威严审至三鼓未及一半余觉寒甚出换猗猗厚裘回视廉使坐南面旁设余座灯烛辉辉侍立之人类皆狰狞猛恶大声喝呼闻之悚然阶下之人各各战栗枷锁之声恐人心胆因叹曰所谓阴间森罗殿者谁其见之哉会勘完止坐为首六人余以胁从宽之后待罪西江每每念及多于死中求活三年之久

庶于心无愧也

西江臬署有揆道堂七间高大轩敞自明季余每于听讼后一更时独坐公案默祝所审事件有冤否已决人犯有屈否或神明警戒我或鬼物责备我我坐此静候胡不速至耶漏三下终寂然余方退寝

揆道堂西畔轰于雷梁柱皆老楠木想前朝旧物也其下惟蜈蚣穴数处然蜈蚣甚小别无他异

扬子江以北数百里平原并无一山而淮安府附郭名山阳县考志书云旧有地名山阳因以名县然未详所以命名之故询诸野老参以己意盖山以南为阳县北有钵池山为二十七【二十七：七十二】

福地之一王子乔修仙处地形较他处高数仞非土非石皆积砂所成岂山阳以此得名耶

洪泽湖心离堤三十里有洪泽邨秋深水落时屋基石础隐隐犹在东坡诗题发洪泽中途遇风复还即此地也明平江伯陈瑄筑堤百里环抱湖水令其出清口以三分济运七分敌黄每水涨时堤里之水较堤外之地已高数丈谚所云日费斗金不抵西风一浪者是也至今一片汪洋人亦不知有洪泽邨矣余初赴河工总理高家堰见长堤屹然巩固宽八丈三尺堤里俱层层石砌纵有狂风巨浪可保无虞也

隋炀帝由河南幸扬州开河行舟今四【四：泗】州之汴河即其故道一日至破釜涧而雨乃易名洪泽涧齐书云洪泽涧在淮阴镇之东淮阴镇即今之清江浦也

予弃举子业即耽吟咏以逐年所得渐次成帙名曰葛庄编年诗盖存诗兼记事也继以乐府古风五言七言律绝诸体各从其类加以删改名曰葛庄分类诗钞业已梓行孔东塘南游返相谓曰君诗分体耳非分类也不见李杜有分体分类各集乎予恍然若失亟命梓人更正而已印行者悔无及矣

后场用表判明时旧制也本朝崇尚风雅特谕阁臣议去判增诗以五言六韵为合格予私念天下才人如星罗碁布知者固多但恐穷陋僻壤后生小子辈不能周知且五言六韵即宋金元明作此格者寥寥无几昭代亦不多见检予生平不过五首而题合试帖者尽一因与同志诸子先取唐人之可为楷法者罗辑名曰花□楼五言六调唐诗豫梓以行提要录二月十五日为花朝予生后一日故命名花豫

老爷奶奶之称乃仕宦家儿女之呼其父母也汤临川还魂记内游园一出杜丽娘云这般景致俺老爷奶奶再不题起近俗称诸神道亦曰老爷奶奶玄天上帝曰真武老爷关夫子曰关老爷岳武穆王曰岳老爷黄河金龙四大王之神称神曰大王老爷称河曰老爷河泰山碧霞元君则曰顶上奶奶清口之惠济祠曰奶奶庙他处凡元君行宫皆以奶奶庙称之在乡人妇女之愚意盖尊之如显宦亲之如父母也近日士大夫称知县曰父母称知府曰公祖百姓称

知县为大爷如府为太爷是县为父而府为祖也等而上之无可加矣则为大老爷太老爷至于妇人之奶奶亦是通称今且一概加称太太矣等而上之则为老太太祖太太明时巡按止称老爹府县止称相公命妇称安人夫人至老相公老夫人而尽之矣近总不闻此称唯老爷太太竟成宦途通套无分官品之大小上下矣明时巡抚称都爷总兵称总爷今一概大老爷在督抚提镇国家大臣受之允当以下盐学监督司道等官亦居之不疑宁不汗颜乎予每闻此甚觉不安但比比皆然未敢众醉而独醒也

商丘宋公记任丘边长白为米脂令时幕府檄掘闯贼李自成祖父坟墓中有枯骨血润白毛黄毛白蛇之异与吾闻于边别驾者不同长白自叙其事曰虎口余生而曹银台子清寅演为填词五十余出悉载明季北京之变及鼎革颠末极其详备一以壮本朝兵威之强盛一以感明末文武之忠义一以暴闯贼行事之酷虐一以恨从伪诸臣之卑污游戏处皆示劝惩以长白为始终仍名曰虎口余生构词排场清奇佳丽亦大手笔也复撰后琵琶一种用证前琵琶之不经故题词云琵琶不是那琵琶以便观者着眼大意以蔡文姬之配偶为离合备写中郎之应征而出惊伤董死并文姬被掳作胡笳十八拍及曹孟德追念中郎义敦友道命曹彰以兵临塞外胁赎而归旁入铜爵大宴祢衡击鼓仍以文姬原配团图皆真实典故驾出中郎女之上乃用外扮孟德不涂粉墨说者以银台同姓故为遮饰不知古今来之大奸大恶岂无一二嘉言善行足以动人兴感者出其罪恶重大故小善不堪挂齿然士君子衡量其生平大恶固不胜诛小善亦不忍灭而于中有轻重区别之权焉夫此一节亦孟德笃念故友怜才尚义豪举银台表而出之实寓劝惩微旨虽恶如阿瞞而一善犹足改头换面人胡不勉而为善哉若前琵琶则高东嘉撰于处州郡城之西姜山上悬黎阁中予守括苍曾经其地阁虽已圯而青山如故不胜今昔词人之感传言明太祖读琵琶记极为称赏但欲改易一二处面语东嘉曰诚能改之当赐以官东嘉唯唯然竟不肯易一字于此见其品行之高记中宾白宏博可以见其学问之大词曲真切可以见其才情之美自古迄今凡填词家咸以琵琶为祖西厢为宗更无有等而上之者至于立名琵琶或云因指王四而言赵五娘者赵姓下第五为周氏蔡邕者取卖菜佣下二字同音也皆不可考既诸姓名假借何独有取于伯喈中郎而加以不孝乎且汉世尚无状元之名未有八旬父母其子娶妇止两月者况陈留距洛阳不远焉有子登巍科赘亲相府官居议郎不捷报于家并道路相传无一知之者陈留洛阳属邑如此饥荒即使不归何难拯救乃忍听父母饿死而耳无闻者及至五娘上路忽又有李旺接取家眷一差种种疑窦在东嘉或有别解今后人曲为回护终属牵强恨不一起东嘉而问之予题一绝云琵琶一曲写幽怀自是千秋绝妙才歌舞场中传故事蔡邕真个状元来

近来词客稗官家每见前人有书盛行于世即袭其名著为后书副之取其易行竟成习套有后以续前者有后以证前者甚有后与前绝不相类者亦有狗尾续貂者四大奇书如三国演义名三国志窃取陈寿史书之名东西晋演义亦名续三国志更有后三国志与前绝不相侔如西游记乃有后西游记续西游记后西游虽不能媲美于前然嬉笑怒骂皆成文章若续西游则诚狗尾矣更有东游记南游记北游记真堪喷饭耳如前水浒一书后水浒则二书一为李俊立国海岛花荣徐宁之子共佐成业应高宗却上金鳌背上行之讖犹不失忠君爱国之旨一为宋江转世杨么卢俊义转世王魔一片邪污之谈文词乖谬尚狗尾之不若也金瓶梅亦有续书每回首载太上感应篇道学不成道学稗官不成稗官且多背谬妄语颠倒失伦大

伤风化况有前本奇书压卷而妄思续之亦不自揣之甚矣外而禅真逸史一书禅真后史二书一为三教觉世一为薛举托生瞿家皆大部文字各有各趣但终不脱稗官口吻耳再有前七国后七国而传奇各种西厢有后西厢寻亲有后寻亲浣纱有后浣纱白兔有后白兔千金有翻千金精忠有翻精忠亦各【各：名】如是观凡此不胜枚举姑以人所习见习闻者笔而志之总之作书命意创始者倍极精神后此纵佳自有崖岸不独不能加于其上即求媲美并观亦不可得何况续以狗尾自出下下耶演义小说之别名非出正道自当凛遵谕旨永行禁绝

属对虽曰小技然有绝不能对者有对而勉强者如泥土地对铁金刚刚字从侧刀非金傍也即石城隍亦不合格至一二三则绝不能对矣烟锁池塘柳对以波照锦堤梅殊无意味梅香春意动连符苍司马对以月老夜情多仍欠自然枣棘为柴砍断劈开成四束何等真切对以阊门造屋移多就少作双间何其谬也又荷盖水珠柳线松针穿不过纯用假事更难属对惟蝉以翼鸣不啻若自其口出龙因角听母乃不足于耳欤巧合天然偶过山阳学明伦堂见一联云黄河水滚滚而来文应如是韩信兵多多益善学亦宜然颇称爽贴明嘉靖时以青词幸进者甚多惟袁慈溪相国□醺坛一联不独在诸青词之上亦在相国青词之上联云洛水元龟初献瑞阳数九阴数九九九八十一数数原于道道通元始天尊一诚有感岐山威凤两呈祥雄声六雌声六六六三十六声声闻于天生嘉靖皇帝万寿无疆

予守括苍时过青田青田有南田山者诚意伯刘伯温先生故家也先生为明开国元勋功业文章铭诸政府昭之史册传之艺苑脍炙人口虽天文历数之学何尝不为寓意然不端属乎此自胡惟庸进谗以谈洋司有天子气谋为葬地先生忧愤成疾惟庸以医来饮药腹中积块如石疾革太祖遣使送归还乡月余而薨后世专以鬼怪附会矣乃谓先生未遇时得天书于白猿看守之石壁壁裂得书一匣书中语句多不得解遍访无知者幸遇周颠仙于山寺拜为师指示精习始知天文地理未来过去其佐明兴国者天书颠仙之功也故凡事预知言无不验一日太祖微行适勋戚家造屋正上中梁过其门见门后一人身服齐衰状貌丑恶一瞬而灭太祖回问曰今日上梁触犯凶星是何人选择者刘伯温答曰是日虽犯丧门神煞喜遇紫微冲破能化凶成吉耳太祖暗惊又一夕宿民家无物枕首乃以量斗为枕窃听邻家聚饮忽一人出外小遗大呼曰不好今夜天子私行吾辈当仔细荧惑入南斗天子下殿走太祖急推斗而起又闻饮者羣出言曰离斗口尚远即当归位也太祖回告伯温伯温曰臣观天象亦如此遂下诏不许民间私习天文其事类此者颇多太祖心久疑之因惟庸之谗外示保全心益猜嫉闻其死乃遣人将其殓棺前锯一尺意欲断其首也及锯乃是空棺内贮大明律一部而独揭发冢一条开棺见尸者斩盖伯温已先知之故预造此长棺空前一段以待其锯也遣人回奏并以律呈太祖见而惊叹曰律为吾造吾自犯之耶遣令安葬而止迨年后裔贫困异常至本朝仅有诸生数人昔年所赐田土山陇俱编入与齐民一体办课矣每有山崖洞壑被人掘启者必讹传曰刘伯温当年留下藏埋迨子孙穷困至急则发露令掘用耳嗟乎此亦何常之有不过因其神异而附会之予守括八载知之甚悉读太祖所赐手书诏旨称曰老先生其隆重倍于侯伯勋臣凡此怪异不一而足皆齐东语也予有过青田怀先生诗云谁识西湖一片云

【公尝游西湖见异云起西北众以为庆云公乃大言曰此天子气也有王者起吾当辅之】

万山堆里出元勋当时共比明良会后世偏将鬼怪闻丞相无端穷地脉

【胡惟庸以旧忿使人陷公欲谈洋司为墓地】先生有意秘天文

【临终以天文书授其子璉进上且戒之曰勿令后人习也】

晚年不辟留侯谷岂为明君异汉君

青田县有混元峰在城之北一里青田山上为道书第三十六洞天唐人刻厓上混元峰三大字即试剑石相传叶法善炼丹此山以神剑纵横试斫之石分为四高百余尺相距各三尺许类截肪予曾题一绝云块然一石四分离传说仙家伎俩奇山路崎岖行不得更烦此剑亦平之此诗竟逸其稿分体编年俱未登梓偶检括苍府志得之附记于此

章奏文移告谕前列曰官衔各随品级之大小而署之明武宗复议北巡实事游幸自称威武大将军太师镇国公朱寿巡边命内阁草敕杨廷和等上疏力陈不可疏上不省廷和称疾不出武宗手剑立命梁储曰不草敕齿此剑储免冠解衣带伏地流涕曰草敕以臣名君死不敢奉命遂止予以为官衔从无此尊崇者然不过游戏耳未尝实有其事本朝相国图海督师秦中予见其檄文及告谕衔云抚远大将军一等公都统文华殿大学士吏部尚书图位列五等皆系极品亦可谓尊崇之至矣

温州观察驻扎定以温州府城城之北有松台山上有望阙亭傍山下有宝纶阁为前明赠太师张文忠孚敬之相府也孚敬初名璉以议礼迎合世宗与桂萼方献夫一同骤贵璉更善伺人主意不期年由南京刑部主事超升翰林学士后遂登政府赐名孚敬今子孙虽式微其府第犹存家藏遗像二轴予亲见之一为张公坐像戴纱帽而两翅尖锐服大红纁丝仙鹤背胸腰围玉带一画世宗皇帝像上坐两傍各画太监十数人窄袖软带牵马而立张公远来朝谒戴长扁翅纱帽如今戏中扮官长所戴者服蟒衣玉带皂靴全不似今戏中所戴丞相幞头上面皆方而两翅扁方曲长以向上者惊衣系长领非如戏上之圆领予甚讶其不同及见草木子所载蝉冠朱衣汉制也幞头大袍隋制也今用蝉冠朱衣方心曲领玉佩朱履是革隋而用汉也此则公裳纱帽圆领唐服也仕者用之巾笠襴衫宋服也巾环何领金服也帽子系腰元服也方巾团领明服也庶民用之朝服一品二品用犀玉带大团花紫罗袍三品至五品用金带紫罗袍六品七品用绯袍八品九品用绿袍皆以罗流外授省札则用檀褐其幞头皂靴自上至下皆同也阅此想明时尚沿前制未尽改欵幞头始于后周而画汉时之像竟有用幞头者又不知何解也

张璉以议礼干进怙恩作奸固非善类然其改奉孔子为先师易像为主此千古卓识最得大体者不可因其素行而没之

网巾之制历代所无此物起于明止于明诚一代之制也因明太祖微行至神乐观见一道士灯下用马尾结成小兜太祖问为何物对曰此网巾也用裹头上万发皆斋矣昭日召道士并取所结网巾遂为定制

吾友申符孟涵光张越千彪王紫诠瑛其壮年名字皆具超达飞腾之气符孟以世家门荫越

千以博学茂才紫詮以部郎出守历仕观察及其后也符孟不乐什【什：仕】进改字曰鳧盟号曰聪山越千绝志场屋改名曰漉改字曰月阡号曰曼持紫詮罢职闲游改名曰嬰改字曰紫谿号曰能如名与字音同体别不独寄兴林麓放情鱼鸟而取号之义实出有心玩世逃禅入道不复营营人事非好鹜高远耽寂静也盖亦无可如何者耳文人暮年多事仙佛太白游仙香山偕老道场二公犹然况三君乎

尝言营造房屋时不宜呵斥木瓦工匠恐其魇镇则祸福不测野记记莫姓家每夜分闻室中角力声不已缘知为怪屡禳弗验他日转售拆毁梁间有木刻二人裸体披发相角又臯桥韩氏从事营造丧服不绝者四十余年后为风雨所败其壁中藏一孝巾以砖弃之其意以为专戴孝也又常熟某氏建一新室后生女多不贞二三世皆然一日脊敝而缉之于椽间得一木刻女子任三四男淫褻急去之帷薄方始清白所载明悉历历如绘予犹疑信相半待罪处州太守时其大堂五楹虽极轩敞壮丽但造自嘉靖未免年深少有欹侧窥其梁柱有朽者命匠人以斧头敲响以定其中空实敲至正中西柱匠人睨而笑曰此中有物竭力一击乃开大穴内藏木刻人头耳目毕具如碗口大予不以为怪亟投诸火其时康熙三十一年岁壬申予举卓异随迁江西九江观察副使代予者为刘起龙今亦十余年矣安然无恙历考府志自嘉靖至今太守能循资而升者绝少岂真营造时果为木工所魇镇耶殊不可解

俗以官吏不参正五九其谓官长莅任不宜用此三月者此说起于宋宋以火德兴盖火生于寅正月为寅旺于午五月为午墓于戌九月为戌谓此三月为灾月当避也予自筮仕以来虽历任五迁而摄篆署理不下十余次凡一接印即赴视事弗少迟延不独不拘正五九月抑并不选择日期是以不为横惑胸中然每见此三月亦有亲友莅任者未见主何吉凶也

谚云初五十四二十三太上老君不出庵又云太上老君不炼丹谓此三日为月忌凡事必避不可用也野语云卫道夫闻前辈说此三日即河图数之中宫五数耳五为君象民庶不可用予为解之月忌之说太诞君象之说太腐皆非也日辰各有所犯生克之理随时变化未有以此三日遂为万古不刊之典不较年岁不拘干支不论节序而一概论之也予任浙东观察时于十四日远接制府归得疟疾家人辈皆以犯月忌所致予笑曰此日文武官属同行者甚众岂人人尽患疟疾耶众亦失笑

今称父曰严易家人象曰家人有严君焉父母之谓也则是母亦称严今称母曰慈而每称人父子曰父慈子孝则是父亦称慈尔雅妇谓夫之弟曰叔曲礼叔嫂不通问后世亦有称夫之弟为小郎者见于唐宣宗责万寿公主曰岂有小郎病不往视乃观戏乎王衍妻郭氏怒衍弟澄曰太夫人以小郎嘱新妇谢道韞遣婢白献之为小郎解围两家缔姻相称曰亲家见唐萧嵩传皆平声今北方以亲字为去声按卢纶驸马花烛诗云人主人臣是亲家则去声有所本矣近又呼曰亲家公亲家母

江南督标中军副将衔大者升总戎顺治间一李副将升福建总戎时先祖为江南方伯约诸同僚公饯让李首坐李云不敢先祖曰公升总镇今非昔比矣应如此坐李作局蹴不安状曰老爷们原是金子小弟到底是块锡众官为之捧腹

四川一参戎升广东协将到汛最迟郡守郊迎云望公已非一日何迟迟至今想因蜀道难行耶协将答曰家口众多就难行了倒也论不得熟道儿生道儿

一守备由小军出身见上官仍称小的上官曰尔今官矣犹如此称殊不雅可易之备曰将如何上官曰称卑职备切记之一日队伍中有年长者获罪于备盖自恃为备之前辈未免骄纵备大怒曰卑职今是尔之本官如此放肆难道卑职不敢责尔耶众兵哄堂益轻之材官健儿辈每遇督抚提镇赏赉优待必曰大老爷的恩典一游击年将望五始生一子制府闻之贺曰恭喜尔得一子矣游击急趋跪谢曰大老爷的恩典两傍听者笑几失声可与南唐宫中赐洗儿果有近臣谢表云猥蒙宠赐深媿无功李主曰此事卿安得有功此语同堪绝倒

本朝初年江宁叶某者曾任明末太守有宗室触其怒既难加刑怒又莫解乃使人曳于赤日中而曝之鼎革后隐于医时人戏赠一联云一败一成郡守改为国手九蒸九晒天潢变作地黄其妾张介瑶能诗善画先大父任江藩时介瑶以扇献先大母上画官舫岸人曳牵题云舟中人被利名牵岸上人牵名利船江水悠悠浑不断问君辛苦到何年诗句超脱但不似女子口吻耳

●在园杂志卷四

壬子癸丑冬春间有浙东单友游京师能为扶乩之技余适无事延之书斋者数月顷刻画沙诗词不下数百颇多佳句有出人意表者为时已久散失居多今就其仅存篋笥者数十首钞之

李青莲

花睡

鸟梦

吕道人

武陵老人徐福

弄玉

王乔

谢灵运

张骞

回道人

刘海蟾

白玉蟾

回道人

云翹

刘晨次玉衡韵

青莲

题燕台八景

铜雀台怀古

空潭泛月

○李青莲

人生过隙一夕千秋徘徊诗酒与子淹留云分半榻月到十洲剪玉为韵分金结俦乘车戴笠
白鹤青牛飞觞把臂弄玉鸣鸠能为道合指尔良谋

○花睡

春来月落兴初浓结蝶联莺点翠重无语欲眠芳露冷琼楼深锁态从容

○鸟梦

晚林归去抹遥天高卧南枝隐碧烟不许飞云惊睡觉且将毛羽寄林泉

望后一日社集诸友此夕吕纯阳王方平李青莲云英丁令威五仙赴坛

○吕【吕：回】道人

弱水三千里凭虚一问君开樽休说剑剪烛好论文春意含梅萼风威锁冻云从今与子约慎
莫暂相分

乱批马子拈韵与青莲

许子拈韵与令威

刘子拈韵与云英

单子拈韵与方平

俚句呈青莲大仙求和

青莲乱批刘子进一大觥联句可也即以花豫楼为题花豫者二月十五为花朝予生于十六故名

乱批马子拈韵与青莲 【多字】

梅意书香韵自多月来云静水无波三千酒国随吾啸九十春光奈尔何有鹤欲眠天汉碧将诗送恼海山歌从来花里传经济何必披云老薜萝

许子拈韵与令威 【雄字】

化鹤空将城郭蒙白云无续晚霞红千秋事业梨花梦百代笙歌梵宇钟樽前有句情深浅身外无尘任澹浓放得脚跟天地阔浮鸥沙鸟吊英雄

刘子拈韵与云英 【余云欲得一诗余限小字】

梅魄冰心青黛小渔棹纔来惊醒溪边鸟桃花红片春多少流到人间仍未晓阮郎不见壶天杳宋玉多情吟得回文巧琼楼深闭埋芳草对个婵娟情自好

单子拈韵与方平 【仙字】

人生如朝露邂逅好相怜汉苑春风后秦疆烟草前和歌酬浊世把酒问青天能以葫芦里敲枰第几仙

俚句呈青莲大仙求和

梅有清芬月有华敢将诗酒动仙槎逍遥天上来青鸟游戏人间走白沙一语纔成摇海岳千瓢微醉卧烟霞风流百世仍如许愿掷凡夫枣似瓜

和

寒云锁月镜飞花瀛海尘寰过尔家千迭玉箫吹紫凤九还金液炼丹砂东君有意催春雨北海开樽听暮笳今古一宵诗酒客归来长啸问胡麻

青莲乱批刘子进一大觥联句可也即以花豫楼为题花豫者二月十五为花朝予生于十六故名

瑶池昨夜祝羣芳今日天台谪阮郎月里参差铺锦绣人间迤里琢圭璋鸟歌初度南飞曲蜨板先敲宿雨香【青莲云方是两日光景方平结他日南宫仪凤□始知云影映清光云英云方平结句不佳改之】笑吐玉壶春十二一帘云影接蟾光

【青莲云可称全璧花豫楼从此不朽矣再作一小引何如云英代之】依来上苑时际嘉平碧岫停云红波挂月萧楼人寂冰壶夜寒敲金戛玉百迭千回把觥吟风千秋一日问刘郎之凤馆春半瑶台啸阮籍之苏门月中琼宇祝花神干宿两介眉寿于芳晨所谓借花生意听鸟天机梦游八极羣英引领春风星映连朝烟玉飘摇皓魄故楼名花豫人列仙班聊以八言惟希一粲

○武陵老人徐福【又批今日有诸仙来当备佳酿各自留题】

半亩逃秦地千秋避世人闲调蟾窟曲静看茂陵春壶里天原小囊中剑有神沙棠载琴鹤终日卧渔津

○弄玉

寒事将了了梅音有分晓明月何多情轻云忽淡扫醉卧石床飞高吟过蓬岛流水抚松枝凭虚逐归鸟邂逅李端端企仰苏小小而以相思琴报得同人好极目眺平芜青门尽芳草愿寄长干行绿云人未老

○王乔 【赋得爱月夜眠迟】

夜将花起云影翻流水婵女多情情不已伴风中待露里西窗欲落消魂无端冰魄梅痕这样清光错过人生几个黄昏

○谢灵运 【咏花睡鸟梦调用如梦令花睡限梦字鸟梦限睡字】

花睡

鸟梦

青莲

花睡

春夜云深露重醉倚雕栏乘兴抱蝶气婵娟笑尔孤零谁并休动休动正做红妆好梦

鸟梦

归去哑哑队队共觅华胥良会枕月卧云巢相抱松风鹤唳惶惶愧惶愧博得南枝稳睡

青莲

乘月凭虚来又为织女约停梭相劝酒星河代洗脚我道玉衡邀织女则不乐昔日张骞槎怪他恩恩过青莲尔多才有诗待子和下我珊瑚床悬我明珠络与子结千秋莫学牛郎薄青莲笑不然玉衡颇清脱弄玉擅吹箫开樽待同酌吟咏即归来与子慰寂寞云汉白茫茫婵娟青灼灼愿得醉翁情千秋为好合顺得玉衡情采兰赠芍药听得鸟嚶嚶慎莫气盘礴诗胆破重霄飞上通明阁

○张骞

云敛香消日影斜春风欲到上林花千江碧浪穿明月万壑青萝鏤绛霞傲骨嶙峋天共老襟怀浩渺海同赊自与赤松游汉苑至今犹犯斗牛槎

○回道人

水云游遍乾坤小花落花开人易老闲来飞过洞庭秋铁笛一声天澹扫

○刘海蟾

【问世有戏蟾像是大仙否批吾乃先朝宰相得道后化一戏蟾疯子笑游尘市以度世人】

几宵灯火结层氲采药人归报属君赤舄不穿忙跨鹤黄冠倒戴细论文花枝簇簇婵娟影粉蝶翩翩玉女裙今日联盟留好句向卢高卧九臯云

青莲乱批共飞仙而把臂同明月以传杯不以联吟罚依金谷咏梅花联句四首

二子起句了

云长过此即补梅花一首

又批梅花诗青莲续完可也

青莲题钟馗嫁妹图赞

咏灯花得烛字联句

王方平

青莲乱批共飞仙而把臂同明月以传杯不以联吟罚依金谷咏梅花联句四首

六桥寒玉散空江
驴背春风酒一缸
嚼碎冰魂香片片
含痴皓魄影双双
香随蝶梦罗浮远
【余云此句微妙不能联愿罚三杯】
月入林莺琴韵降
【李云对不过上句大仙亦当罚以巨觥批呵呵果然不佳异日再改】
自是清芳余傲骨
不教桃李影横窗
青莲

二子起句了

俏立风前态自奇
撩人幽韵两三枝
半壑轻烟笼玉屑
一帘清影映瑶池
芳心古道甘凉薄
傲骨衷情学醉痴
卧石眠云慵不起
美人无力枕微支

云长过此即补梅花一首

忠报东君孝报寒
灵根恬澹玉肌干
留芳百世人还易
立节千秋道所难
心彻冰壶霜雪冷
骨凌松雨水云宽
高吟醉卧江南曲
疑是孤舟晏兴阑
虬 【虬：衍文】

又批梅花诗青莲续完可也

澹玉凝妆拂碧枝
空蒙山影笼寒迟
轻云剪雪团衣袂
冷月裁诗醉竹篱
琴鹤多情聊韵耳
烟霜着意好吟之
春来无限芳菲事
独尔精神逗素姿

青莲题钟馗嫁妹图赞

这是钟馗果然古怪
骑着驴儿看他自在
为甚么袅袅婷婷
又把青罗盖小鬼头
张彩摇旗老进士簪花
簪带嫁得檀郎
定是才高德迈
决不学牛女银河
决不学镜台夙债
愿玉树相偎红楼恩爱
咦我晓得了最怜你阿妹多情
怕杀你舅爷无赖

咏灯花得烛字联句

一点芳心嗔蝶宿（刘海蟾）
倒喜飞蛾乱向花心触（青莲）
有春光无香露霏霏
玉蕊伴

尔寒窗读（青莲）枝叶无依月作根风来摇落方知烛（海蟾）

王方平 【渔樵野调】

疏疏懒懒夜深诗兴浅短剑长歌光阴可奈何襟期诗酒问天而搔首笑傲烟霞许我结丹砂
炼石归来月正华冻云高拂凤凰车到处是吾家

○自玉蟾 【游渔啖花影】

一湾清水沈醉风前蕊清光掩映波痕游鱼争欲相吞只知有色散南溟不道空清碧鉴明春
意皆如此水底飞来不已

○回道入

风风风雨雪洒长空世界妆成天外景君家促我下瑶宫计颂古今谁是伴独留芳躅在崆峒

○云翹

云姨月黛小红儿三个仙鬟去采芝我欲梳头朝上帝洞门不鑲等多时

○刘晨次玉衡韵

天地虽留我才华欲属君客酣千日酒鹤下半潭云明镜英雄鉴长河世业闻等闲沧海梦拂
塵不堪论

问阮郎何在当日桃源故事肯一见示否

问阮郎何在当日桃源故事肯一见示否

阮子桃源去已迷落花流水任东西山川剩有春风在留与诗人作笑题

○青莲

诗分严令酒为兵战退寒威万籁清灯火既留天上侣襟怀岂是世闲情文光照耀三千丈道德高超九万程记得清平歌未罢满庭红玉带云生

青莲吾有一题尔等联之小窗鹤梦

睡松

老梅

白月浮钟

青莲吾有一题尔等联之小窗鹤梦

掠舟西去下空庭既白东方睡未醒漫拂羽裳抟北溟带来琴韵到南汀松龕冷月酬孤啸瓮牖寒云护晓星渡海觉来看世界一声烟雨九臯青

花花草草吊热闹之英雄雨雨风风醒伶仃之客梦海筹十屋桃核千春到底归来亦同泡影神仙玉棺轻风蝉脱今夕何夕与子徘徊同分半榻寒云共悟三生旧果慎勿蹉跎岁月顿负枕上羲皇徒令婆心尔尔

又次韵二首

风流不碍旧青衫天上骊龙袖里探道骨自随湖海大雄风肯与世情含孤踪野鹤何妨老长啸苍梧漫尔惭最是玉华春事茂一帘琴韵诵江南

风流不碍旧青衫丹鼎盐梅袖里探半榻闲云留鹤梦一帘香两润鸡含文章老去犹生色冠冕归来不用惭试看宛陵山泽好满天星斗映江南

睡松

抱鹤卧长天翦轻云鏤碧烟虬龙夜夜随展转吼风云醉眠挺雄襟笑颠任他沧海桑田变最堪怜蜉蝣朝菌敢说岁三千

老梅

瘦骨偏飞雪里花一帘寒影映奇葩罗浮梦逗千年月汉苑魂消午夜槎断岸香云长结侣孤山明玉自为家披襟已许冰霜劲长啸松涛玩物华

白月浮钟

蟾光如练絮瑶台远韵拈云取次来疏雨沈音敲断壑澹烟传呗响莓苔听残寒渚天犹老唤醒空林梦亦回想象婵娟歌未罢蕊珠宴玉夜徘徊

○题燕台八景

琼岛春云

玉泉垂虹

太液澄波

蓟门烟树

居庸迭翠

卢沟晓月

金台夕照

西山霁雪

琼岛春云（青莲）

一抹轻烟万缕霞栽来片片絮寒沙林迷野墅千重碧鸟度斜阳九极赊春想衣裳香露冷风来
来帟幔暗罨斜连朝暖碓何堪似楚楚青螺衬绛纱

玉泉垂虹（云长）

静谷寒波挂碧峰万山雨后一天红飘摇欲卷旗旌午汗漫长飞海岳空玉柱有光擎大地石
潭无影动游龙丈夫极目争长啸剑气铮铮贯九重

太液澄波（云英）

芙蓉池水碧于烟秋梦偏长最可怜红镜欲飞鸳黛懒翠翘深锁凤台悬相思镂月酬团扇冷
韵敲风泣暮蝉下水晶端正绮轻描莲幕唤飞仙

蓟门烟树（刘晨）

塞草沙风不胜春万林晴霭上枫宸东来已望层云薄西去犹知远黛陈看尽古今余壮气磨
来日月倍精神自与凤城相对好参差青影接嶙峋

居庸迭翠（萧史）

欲上关前眺玉都岚烟不碍白云孤层波汗漫天风碧苍黛嶙峋王气扶浓澹远铺千树锦参
差遥接百花图何须羌笛悲春事今古兴亡若是夫

卢沟晓月（王方平）

洪涛西去镜孤飞送老燕山客路危杨柳断桥千里梦
莺花长店十年非利名场上英雄鏖今古愁中岁月围多少
五陵豪贵客苍然芦荻吊轻肥

金台夕照（刘安）

郭隗功业几春秋驻马斜阳燕水流
骏骨不枯声价重雄襟未托意相投
云光远护秦关杳剑气高飞帝阙浮
最是荆轲知己恨天涯老去任虚舟

西山霁雪（刘海蟾）

一壶天地一瓢诗极目晴岚任所之
林暮欲明烟澹澹峰回纔转树差差
镜含绛玉人依鹤天鏖琼台月浸池
不避晴辉酬世眼万巔招饮映琪枝

○铜雀台怀古（刘海蟾）

汉家功业已萧萧禾黍秋风历世朝
东去烟岚飞劫火南来赤水拂鸣条
千年流瓦堪为砚二月春风想阿娇
寄语机关名利客空余芳草卧云霄

○空潭泛月（青莲）

烟霞知己木兰舟相伴婵娟任去留
短棹穿来菱镜冷长风摇破碧天秋
波光潋潋沈星斗沙鸟空蒙啄泡沬
一片清辉何所似玉壶冰雪映瀛洲

仙凡不隔意气相孚诸子不豪吾侪亦寂
倾大斗以呼天放长歌而寄傲问婵娟消息
怜孤鹤之飞鸣惜牛女殷勤度寒梭而放浪
天知吾老存诗骨于人间酒纵君才飞霓裳
于阙下平原愧兵火之情秦汉埋是非之口
乐哉今日尽属忘机永矣他年不堪重订牛
羊衰草悲歧路之风烟鸾凤箫台看英雄之
事业但将肝胆酬人不愧乾坤生我叮咛告
诫诸子何如

斋中虽有数友而成章之速令人应接不暇因以一题难之第一句用春夏秋冬二句用喜怒哀乐三句用琴棋书画四句用风花雪月即以风花雪月为韵索绝句四首方出题限韵而运乱如飞顷刻立就亦异事也

海棠帘外露娇容 【春】 含笑桃花半面红 【喜】 一奏虞弦消永昼 【琴】
不知庭院欲熏风 【风】

斗柄回南乳燕斜 【夏】 漫将蒲剑斩青蛇 【怒】 槐阴深处楸枰午 【棋】
敲落蔷薇一树花 【花】

澹烟衰柳残蝉咽 【秋】 瘦马斜阳独悲切 【哀】 一行雁字写长空 【书】
不堪鬓上江湖雪 【雪】

阵阵朔风沙草白 【冬】 浅斟画阁红炉热 【乐】 卷帘闲看小江山 【画】
梅梢挂个多情月 【月】

古乱仙诗传者固少佳者亦不多见兹十中存一首首见奇句句标新抑且每命一题言纔脱口业已运乱如飞诗词序跋应手告成矣即使宿构抄誊亦不应其速乃尔虽神仙游戏自异尘凡然当萧史弄玉徐福时五言未创淮南王关夫子时何来近体岂谢康乐亦解作如梦令耶心窃疑之恐非神非仙也或才鬼遇符而至托以示幻亦未可知偶谒大司空朱公之弼一见即询君近何为答曰闭户读书为应试地耳朱公曰是大不然吾人读圣贤书正大光明必体气充裕今君满面阴气何也予惊惧诺诺而退遂毁其乱坛止志其诗词之佳者

赐第在西华厂南门近东空地一区每夜犬吠不止家人杨骚达子梯墙而视火光荧然以为财也急告先君初犹未信后往视之叱曰此青磷也何怪焉家人默然三更后潜率其子踰墙而往掘地三尺果得枯骨一具先君知之大笑即令买棺盛之移瘞野外后遂寂然先君出征闽中贼平后入山搜捕余党轻身前进从人行李仍留营内有俸饷银数百两内元宝一余俱小锭藏瓮中家人连二每夜见一母鸡带雏数百飞立屋瓦之上先君回军前项散给兵丁遂无所见岂小人福薄不能压此物耶

先君在闽闻先慈马太君丧亦效世俗延僧诵佛书于郊外放焰口夜将半见红灯前导从者数骑冉冉而来意谓必参领李某探望耳久待不至差人飞马往迎忽不见

先四叔光耀为泾州牧出城过一旅店门首大旋风围绕不散即下马入店店王之妻蹶家人田二足云凡事遮盖当有重报盖误认为衙役也田二以告愈疑之遍搜内外毫无形迹忽闻灶下一声如爆竹然其旁有干马通一堆掘之得死尸银百两布百四十疋是其谋财杀命者其夫方在后园掘窖盖欲于夜间掩埋其尸耳战栗不能动一询即服夫妇伏诛

陆佃云鱼满三千六百则蛟龙引之而飞纳鳖守之故鳖名神守鹅亦有能飞者湖南李方伯

畜鹅成百一日连翅御风而飞不知去向幕友曰此不祥兆也未几方伯卒又江南天长县铜城镇镇为吴王濞铸钱之地有姚姓家巨万畜鹅数百鹅夜见人羣惊而鸣其声哄然有警则觉既可畜以取利又可防盗守更突然衔尾羣飞如白鹭横空众多不解期月奸人诬以助饷谋叛伏诛家产籍没谚云水净鹅飞几先见矣

妹倩董副使绍孔昔任西安太守为余言秦中有商于外者归挈一犬以行抵黄河行囊在船候人满乃渡偶腹痛欲浮亟上岸犬随往有布袋裹银五十两解置地戏向犬曰看好少顷舟子以人满风顺连催登舟帆已满张一瞬而开矣关中黄河水如建瓴对渡二十里许方达商入舟方悔忘银与犬然日暮不能再渡明晨纵往安得前银尚在遂归越明年渡河复经前地慨然曰银已无存犬何归乎往寻见狗皮覆地检之白骨一堆耳商悯焉掘地埋其骨骨尽则前银尚在盖犬守银不离甘饿死覆尸银上耳商泣瘞之为立冢谚云宁畜有义犬旨哉言乎

先外祖母家蠡仆窠三锄园露一巨坛三喜曰此财物也亟以棉衣质银买牲楮祭拜及开坛惟满坛白水下有银一小錠秤之适偿其办祭之数

扬州之宝应县运河内有红船二泊甚稳忽被暴风飘起一送向东岸野田内一送向西泛光湖中离河下坂一家方祀先下拜毕起视所居房风飘云际如纸鸢状而祖先前之香火仍荧荧然康熙壬午七月十五日事也

乙酉五月阅看河道形势驻盱眙县之玻璃亭数日大雨如注稍霁扬帆赴龟山淮渎庙庙在水中即大禹时命大将庚辰锁水怪无支祁处返棹时风雨大作雨点大如茶盂见四龙挂空中最近者可一箭及之然皆不露头角止见大水四股倒流上天如旱地之大旋风声势俱恶历数十刻渐次消完完时犹若有余波自上而下者据土人云年年有之无足怪王新城渔洋集亦载纪异行壬寅七年海东啸崇川化作鼃鼃乡今年雨雹杀禾稼雉臯民徙龙为殃注有龙见如臯境内挟巨舰飞空中则龙见亦寻常事也

乡人有马生驹驹已长可乘母马又将受孕乡人惜费即欲以驹与交百计道之驹弗肯虽畜类亦知伦理其邻教以物蔽马与驹之目驹不知遂交交毕去其蔽物驹见其母咆哮奔跃触树而死里之长鸣于官官曰尔愚民也为省小费爰丧其马马不羣母尔知之乎尔真禽兽之不如也重责之令瘞其驹康笔帖式曰诚然口外马羣以数千百计然溷杂难辨久而忘焉亦不识孰为何马之驹孰为何驹之母偶为检查见有驹而盲者目病者阿敦大曰此必自羣其母也阿敦大司马者之官名

余昔守括苍兼摄杭郡于藩库见一草植麒麟皮系牛产于萧山民家首肖牛小角嶄然遍身鳞甲鳞大于钱而色黑及踵皆有尾似纨扇而图小鳞甲砌满又大石块分而为二中有穴光滑润泽绝无斧凿痕吏人曰此空青壳也其穴即盛空青者俗云石有空青人无瞽目果其然乎

广平赵进士昌龄云明崇祯末年京师一痴汉能变美人初延痴汉于家使之醉饱卧于室内

遮藏甚密不许人见设镜台衣服之类少顷装成绝色女子冉冉而至坐南面设香烛供奉自言名申生已登仙箓不食人间烟火惟啖果而已人稍稍近之便觉昏闷一日诸恶少置数大爆竹于香炉内香尽竹响如霹雳声出其不意美人大惊卸去衣饰乃现真形如犬大猕猴跳跃升屋而去始悟申者猴也不食烟火爱啖果者猴性然也回视痴汉欠伸喜曰我半年在醉梦中今日方醒

先中丞为江南方伯时衙署即明朝徐国公达故宅也旁有瞻园山洞池馆无一不备一日有长随马化者膂力过人心粗胆壮向池边闲步时已薄暮见一女子色殊艳丽先则反接徘徊后即倚栏小憩马心异之因思主翁眷属尽系满妆今此汉妆必怪物也趋向前双手关抱彼惊一跃马已昏倒在地少顷马之寓处飞沙走石门窗几榻为之荡然有时饭熟釜内尽是马矢有时家人溺器无一存者有时清晨夫妇衣帽俱不见寻至粪窖中悉被污秽如此旬日不堪其苦告之先中丞亦无法可治幕友徐子干代为筹划取黄纸书词状令马于城隍庙焚之如此三夕闻人马金戈之声纷驰屋上次蚤于院内得一死狐皮而无毛一家遂得安然徐子干每夜闻窗外哭泣声心恶之移出署外卧病一月方痊

东昌曹宅与寒舍稍有瓜葛先世颇富其致富之由后人历历言之始有一老者造谒身短貌陋自言姓白别号餐霞老人称曹为善人欲借宅同居曹曰院宇湫隘未敢相许白曰不须房屋止尔东园草垛足矣曹唯唯次日于屋之承尘内有声不复见形曰吾已挈眷属迁至尊府矣幸勿令闲人往来羣犬更须驱遣勿使擅至东园曹欲设席以尽居停白曰何烦重费主人耶止鸡子数百火酒二尊足矣一日晨主妇见灶下一白物似犬而小熟睡惊之踉跄而去少顷承尘内云今日甚觉无颜未曾衣冠被主母遇见不及一揖幸恕之一夕曹会饮亲友白曰吾当游戏为诸君侑觞可乎曹曰善遂令门窗俱闭灯火尽灭诸人于窗隙中见一物如鹅卵大光灿照耀吐上半空仍复吞入吐则亮吞则黑如此者十余次座客曰此即所谓□珠也曹偶向白戏曰老人来去无踪可能取金帛助我乎白曰吾辈修炼多年上则成仙次则望得人身若行损人利己之事有犯天条祸且不测但主人肯听吾言致富亦易易耳嗣后每向曹曰某粮米当屯某豆谷当积后果腾贵获利无算某药物应贩某币帛应置某夏当旱某秋当涝每得风气之先遂成巨富一日白忽云当于百里外治一大宅家资移去为上曹从之又曰我亦当挈眷向山中去矣迟一月恩恩而言速搬速搬十日后流寇果至焚掠无遗其旧宅尽为灰烬矣

阴曹所差遣曰疾脚犹阳官所役之快手也凡阳世生人应役阴司者曰走无常第不解阴司何以多用生人岂阴司事务浩繁偶不足用欤抑借生人以显其灵异欤若以理考尽属幻渺而又言之确有可据关系生死之大使人不得不信不敢有疑贰于其间者如浚县李某其岳曾为司李相离四百余里李之邻有疾脚者忽向李曰令岳如夫人于今日午前暴亡矣李曰何以知之曰吾奉差往勾也李不之信曰彼素无病何至暴死疾脚曰彼于楼上梳头刚毕被吾脑后一击即吐血掬地气绝耳吾勾至冥司候王升殿曾私问判司彼年少艾何至暴死父母夫妻皆未一诀是犯何罪判曰其夫主司李莅任后接取家眷彼以卑妾冒为正妻公然摆列执事受属官之跪拜以微贱而僭上越分是以损寿暴亡耳李曰此事诚有之四日后讞至讯死状与疾脚之言吻合

走解本军营演习便捷之法晋曰猿骑明曰走骠骑皆于马上呈艺上下左右超腾蹻捷近则男子较少咸以妇女习之为射利之场奸污之技矣须演马极熟马疾如飞妇女乃于鞍上逞弄解数有名秦王大撇马小撇马单鞭势左右插花蹬里藏身童子拜观音秦王大立碑之类或马首或马尾坐卧偃仰变态百出抑且倒竖踢星名朝天一炷香疾驰不稍歇侧两马对面相交能于马上互换相坐统曰走马卖解俗所谓卦子也又有戏幻之术器物可以隐藏饮食可以取致见者无不讶异若西京赋所云易貌分形吞刀吐火云雾杳冥画地成川是幻法也久已不传近今所见不过手法快便眩乱人目而已诚若帝京景物略云捷耳非幻也有弄猴为戏者教习极熟登场跳舞皆合拍或更挈一犬猴乘犬背若人驰马近惟丐者为之更有妇女走索者梁名高絙伎以两木架大绳相去数丈一女行其上或二女各从一头上对舞而前手持一竿缚米囊于两头以权轻重之平前却疾徐如履平地相逢比肩而不倾又有妇女仰卧以两足承巨缸颠播上下无不如意或立一幼女于足底且拜且舞更复向空立一小梯幼女层递擗上复下故作倾跌状观者惊骇卒安然无恙至于三槌打鼓手转三刀以头承丸又其余事矣凡此皆失业贫民不得已而为之藉以聚众醵钱以资衣食然奸盗诈伪亦从此生当作戏术时虽众目环视在在眩盗【盗：衍文】乱何难乘机一作掏摸伎俩乎至走索卖解者流身轻足疾飞檐走壁之技固所优为因系妇女或宦衙演戏大户传唤深闺内宅皆能得入窥探门户出入之路日所经行夜如熟径矣何况鞍马之上便捷轻利抢夺剽掠无不可为亦谁得而御之余观察西江时有走索者以男装女自幼弓足留发穿耳无赖挟之往来甚为叵测余访拏重处递解回籍康熙五十一年部覆陕西提督潘育龙因陈四等一案题奉谕旨将走马卖解□索之人尽行查拏安插并定文武失察处分之例甚严而游手之徒并为敛迹矣

○附陕西提都潘原疏

窃照陈四等率领妻子游走于外凭其走马卖解卖【卖：晒】索算卦为生俗名之曰卦子大抵江北各省皆有此类惟山陕两省此辈尤多其父祖子孙辈辈相习以为生活之计不务耕织游手好闲寡廉丧耻之顽民也臣窃思以为除匪类须穷源除根今臣所属各营已经陆续拏获卦子二十八起合计男妇大小五百八十九名口并马骡牛驴猪羊共六百一十匹头只俱移咨督抚交送有司审理在案但虑秦省各府州县犹有卦子尚多若尽行拏获未有行凶恶迹若不行查拏恐将来此辈难保不行走于外现今遵奉查拏若不行安插恐此辈畏罪潜逃他方聚众成羣妄生事端亦未可定在彼所犯固王法难宥岂不有负我皇上好生之德以臣管见莫若通行各省督抚责令各府州县卫所在乡村堡寨细查如有卦子之徒令其男妇痛改不善之艺或就编入现住地方里甲为民或拨给绝户田地抑或令开垦荒地将有骡马牲畜变为牛种载入赋役册内按季取乡约地方里长邻佑甘结存查如再有违禁出外游走令里长邻佑乡约地方举报地方官严加重处如本地方官不行严查纵容此辈行走被别处地方文武官员拿获议定处分载入例内如是则渐皆化为务本之良民矣

门前一阵骡车过灰扬那里有踏花归去马蹄香棉袄棉裙绵袴子膀胱那里有佳人新试薄罗裳生葱生蒜生韭菜腌臢那里有夜深私语口脂香开口便唱冤家的歪腔那里有春风一曲杜韦娘开筵便是烧刀子难当那里有兰陵美酒郁金香头上彭狄髻高尺二村娘那里有雾髻云鬟宫样妆行云行雨在何方土坑那里有鸳鸯夜宿芙蓉帐五钱一两戥头昂便忘那里有嫁得刘郎胜阮郎右金陵陈大声嘲北妓也名曰南嘲北几层薄板为家业穷蛮那里有鸡犬桑麻二顷田出门便坐竹兜子斜颠那里有公子王孙压绣鞍惰民婆子村庄悄悄牵那里有十二红楼人似仙黄橙梅子充佳味牙酸那里有云枣哀梨蜜比甜竹篱茅舍几多高一钻那里有甲第连云粉画垣八搭草鞋精脚上难穿那里有门迎珠履客三千低头不敢偷睛看皇天那里有赵女燕姬玉笋尖广法苏马弄机关骗钱那里有千金一掷瞻如天右顺德乔文衣作名北嘲南所以答大声也南嘲虽少蕴藉然不过讪笑翠馆红楼中粗鄙之甚者耳词旨分明原无涉于北方人士引诗既雅亦足解颐北嘲则肆声谩骂尽人为讪俨然平分南北反置南妓于不问不独有伤忠厚且词意上下不能贯串殊无足取更有南北解嘲八则不知出自何人以南北之方言方物比合较量权得其平如此之某某也配得过彼之某某此之这般也配得过彼之那般俚句□牙更堪捧腹又出北嘲之下词不足存故未附入

南北谚有冬至数九一九至九九云云亦犹月令中一月六候以验节气寒暖也四方之说各异若夏至后止分初伏中伏末伏并无数九之说偶阅明人田汝成委巷丛谈杭人夏至后亦有数九谚语云一九二九扇子不离手三九二十七冰水甜如蜜四九三十六拭汗如出浴五九四十五头戴秋叶舞六九五十四乘凉入佛寺七九六十三床头寻被单八九七十二思量盖夹被九九八十一家家打炭塹各处节候方言之不同有如此

磁器始于柴世宗迄今将近千年徒传柴窑片之名所谓雨过天青者已不可问矣嗣后惟官哥汝定其价甚昂间亦有之然而不易多得若成窑五彩暗花而体薄者鸡缸一对价值百金亦难轻购本无多也再之宣窑最佳一时称盛而真者固少以其嘉万之间本朝便仿本朝极易混淆至国朝御窑一出超越前代其款式规模造作精巧多出于秋官主政伴阮兄之监制焉近复郎窑为贵紫垣中丞公开府西江时所造也仿古暗合与真无二其摹成宣黝水颜色橘皮糗眼款字酷肖极难辨别予初得描金五爪双龙酒杯一只欣以为旧后饶州司马许玠以十杯见贻与前杯同讯知乃郎窑也又于董妹倩斋头见青花白地盘一面以为真宣也次日董妹倩复惠其八曹织部子清始买得脱胎极薄白碗三只甚为赏鉴费价百二十金后有人送四只云是郎窑与真成毫发不爽诚可谓巧夺天工矣磁器之在国朝洵足凌驾成宣可与官哥汝定媲美更有熊窑亦不多让至于磁床磁灯又近日之新兴也

服饰器用有一时之好尚即戏弄小物亦因时制宜而穷工极巧者明时内官家以鬪促织为能事其养促织之盆稍小于鬪促织之盆一盆皆价值十数金又喜畜猫各编以美名如纯白者名一块玉身黑而腹白者名乌云罩雪黄尾白身者名金钩挂玉瓶之类甚有染色大红者其饲猫之器皿用上号铜质制造今宣垆内有名猫食盆者是也价更重于促织小盆即养画眉翎毛笼内所用食水小磁罐亦价值数金近今惟尚鬪鹌鹑鹌鹑口袋有用旧锦蟒缎妆花刻丝猩毡哆啰呢而结口之束子有汉玉碧玉玛瑙砗磲琥珀珉琅金银犀象而所用烟袋荷包更复式样更新光彩炫耀迩来更尚鼻烟其装鼻烟者名曰鼻烟壶有用玉玛瑙水晶珊瑚

玻璃缕金珐琅象牙伽楠各种雕镂纤奇款式各别千奇百怪价不一等物虽极小而好事者愿倍其价购之以自炫然转眼间所好更变又不知何如矣

昔陕西有以汤驴作方物远贻馈人者据云味最佳美考其制法备极惨酷先以厚板铺地稍高多钉坚实而凿四眼仿驴身驴蹄之大小拉驴上板纳四蹄于眼中不容稍为展转乃以多沸热汤浇之自头至尾遍体淋漓以毛尽脱为度竟成雪白一驴而命已绝肉已熟其死甚于一刀恸楚为何如耶继为取出开膛剖去肠脏分割其肉量大小成块悬之风处风干犹嫌其肉太松将肉用芦箴上下夹好置诸通衢任车马往来践踏久之方行收好不啻珍错之藏非大好筵席不轻用本地极贵重之故远致方物也又天津卫有小鸟黑爪故名铁脚烹炒为下酒物味鲜爽口其鸟羣飞以网罗之一网可得若干其捋毛之法则大奇掘地作一坑用火炽红将鸟从网倾入以物覆之彼于内乱飞相触热气交加互相扑打毛自尽脱不假人力诚火攻也又前朝内监性嗜鹅掌嫌其不甚肥厚乃以砖砌火坑烧之近赤置鹅于上砖热鹅立脚不住自行蹠蹠一身血脉尽注于掌其掌愈蹠愈厚鹅受炙不过而死适于口忍于心矣僧谦光曾云老僧无他愿鹅增四脚鳖着两裙足矣迹者江淮僧人嗜鳖之法甚于俗家釜水微温置鳖于内将锅盖预凿数孔如所置鳖之数盖定以重物压之然后以薪燃灶令水渐次而热鳖觉水热沿盖得孔以头探伸而出先以姜汁椒末酱油酒醋调和匀好乘其热极口张以匙挑而灌之五味尽入腑脏遍身骨肉皆香而死奇惨异苦僧见其状向之合掌曰阿弥陀佛再忍片时便不痛矣真所谓不秃不毒不毒不秃者耶嗟乎口腹之奉谁不欲之即孔子圣人犹云食不厌精脍不厌细亦未尝教人甘为为【为：衍文】粗粝腐儒餐也近日有全羊设饌者以羊之全身制为十六器或十二器而汤点皆用羊又有以全鹅二三只制十二器或十六器者汤点亦皆用鹅不杂他物可谓穷工极巧矣然不过烹炮精美未有戕生害命如前驴鳖之甚者即何曾日食万钱犹云无下箸处赵岳一饮食必费万钱何邵一日之供以费钱二万为限亦不过备四方之珍异耳何尝着其酷烈杀生哉但食品丰俭各随人之性情晏婴为相尚食脱粟公孙弘以丞相封平津侯犹脱粟布被世皆贤之万钱之奉是不为也非不能也乃更有少年纵恣者欲食牛羊诸牲之肉一呼即得不能待其宰杀乃生割其肉而烹炮之吾不知其是何心也裴晋公每语人曰鸡猪鱼蒜逢着便吃予服其天然不设色相是真学问国朝初年扈侍御申忠巡按陕西访知汤驴一事严飭禁止一有犯者罹以重法此风稍戢至鹅掌铁脚鰼鳖生割之惨间有为之者安得复见扈侍御其人遍行禁绝乎京师馈遗必开南酒为贵重如惠泉芜湖四美瓶头绍兴金华诸品言方物也然惠泉甜而绍兴酸金华浊醴均非佳酝唯四美瓶头与涑酒兑半相和则美甚矣但其价过昂杖头每苦不足若煮涑清雪相和名曰兑酒京师所常用者味亦不多让也虽有易水沧州竹叶青梨花春等类总不如涑水苦冽予在淮南每岁于粮艘回空附寄十余坛而来止供冬雪春花之用不能过夏盖南酒不畏北方之寒而北酒则畏南方之热也淮安有腊黄苦蒿镇江有百花德州有罗酒俱可用近来浙西粮艘北上多带涑酒陈者果佳宿迁之砂仁豆酒薏苡陈者亦佳若扬州古称十千一斗金盘露而扬州不闻产酒想谓属邑高邮之五加皮木瓜稀荳泰州之秋露白宝应之乔家白耳至于邳徐一带俱是稀熬较烧酒醺而薄饮者谓淡而无味曰稀无可奈何曰熬相传起自希夷第恐华山处士必非如此造法也太原之桑落酒峻易醉人小瓶潞酒亦曰人参酒在西边亦平常无奇至南方则醇美所云胭脂红滴潞州鲜人多艳称之岂真物离乡贵耶近日玻璃瓶盛红毛酒多入中国然其中有香料茴椒止宜于冬月及病寒者若弱脆之体未可轻饮在

各地方土人俱能制造如刁酒洛酒汾酒羊羔酒之类止宜本处不著名于四方者甚多大约因水取名大半皆是即用黄河水亦曰昆仑觴倘能多加曲米陈窖数年未有不佳者若本质太薄太新如东坡所云甜如密汁酸如藟浆者则藟【藟：衍文】无可奈何矣

陕西有以坛盛酿酒干料留xiao穴旋加滚水灌入即成酒者不识其所名二字当作何写询之范侍讲谈一曰君世家于秦必知其解韩湘云解造逡巡酒此岂是耶侍讲曰是酒渭以北名曰礪子渭以南名曰坛子又曰花坛京师名曰嚙妈未闻有所谓逡巡者然其名甚雅吾当归告乡人请以逡巡易之究竟嚙妈二字不得命名之义终难求解座有俗人强作解事曰吾能解之北方小儿呼其母曰妈妈呼其母之乳亦曰妈妈小儿吸乳母之乳曰吃嚙嚙亦曰啞妈妈此酒用管吸之如小儿之嚙妈也举坐绝倒【嚙俗作口币□□平声】
历载酉不会客会者宴会也杜康卒于酉日酒为杜造故是日不忍饮酒

明宫中小葫芦耳坠乃真葫芦结就者取其轻也内监于葫芦初有形时即用金银打成两半边小葫芦形将葫芦夹住缚好不许长大俟其结老取其端正者以珠翠饰之上奉嫔妃然百不得一二焉因其难得所以为贵也

有奸人取乌贼鱼墨汁为伪券以脱骗人者经年墨消但较之真墨其色淡而无彩昔有人以无可奈何事必欲一谒权要又知权要之必败恐投柬刺于其家日后查取株连客进龟尿写字之法遂书刺进见及权要事败检之则楮朽无迹矣二事相类

与老圃闲语树艺之法圃曰凡种茄欲其子繁俟花时摘叶布于通路以灰规之人践叶灰则子必繁名曰嫁茄若种匏瓠其苗一经牛践则子便苦又杏树结子不繁以处女所系之裙围之则花盛多子亦曰嫁杏闽中诸花树种类繁多独杏树绝少见闽部疏

妇人弓足上古未闻墨庄漫录云书传皆无所自故诗云玉柱插银河又云两足白如霜止言白不言小而金莲之名始于齐东昏侯为潘妃凿金为莲花贴地令妃行其上曰此步步生莲花即各诗中形容美人亦止言其杏脸桃腮柳眉樱口雾鬓云鬟冰肌雪腕并未言及宫鞣三寸新月半弯惟道山新闻云李后主宫嫔窅娘纤丽善舞后主作金莲高六尺饰以宝物命窅娘以帛缠足令纤小屈上作新月状素袜舞云中回旋有凌云之态唐镐诗曰莲中花更好云里月常新因窅娘作也是妇人缠足自五代以来方有之元曲云翠裙鸳绣金莲小后世皆效之矣旧时妇人皆穿袜即窅娘亦着素袜而舞袜制与男子相同有底但瘦小耳自缠足之后女子所穿有弓鞋绣鞋凤头鞋而于鞋之后跟铲木圆小垫高名曰高底令足尖自高而下着地愈显弓小遂不用有底之袜易以无底直桶名曰褶衣亦曰凌波小袜以罩其上盖妇人多以布缠足而上口未免参差不齐故须以褶衣覆之然亦有平底者至睡鞋则用软底

【今称褶衣即膝裤也】予少赴友人之招坐间有以小鞋擎杯送酒者促予咏之予有句云灯前注流霞掌中擎新月虽一时狂兴后亟为删去

雨点着水最易起泡旋起旋灭所谓梦幻泡影者是也小儿作戏亦有以灰淋水曰灰汤入松香量灰汤之多少而入用篾扎成小圈安于直篾上调松香和汤极细而稠以圈蘸汤向空一

绕则成元泡如琉璃状大而碗口中而加拳如茶盂更有极小者随风荡漾顷刻方灭若汤经日晒而浓则一绕可成十余泡宜从楼上台上高处多人绕放轻飘错落殊令人眼花撩乱也

俗云南桥北寺北方之寺多出明时太监创建有一寺费至数万者穷工极巧而在顺天之西山更盛每春三月太监斋僧在平常习套不过蔬食果饼而已而太监辈甚有用腥肴潜佐以酒斯已奇矣更有甚者于远近构寻娼妓多人量道里远近以苇席为圈棚纳妓于中任诸僧人淫媾名曰大布施岂非亘古奇闻耶母惑乎元僧有妻呼曰梵嫂曰房老原非怪事

闻之先外祖母云吾家仓房甚多其极边一间封闭藏贮者一年有余一日开仓易米见梁上一人【脱头字】垂向下头【头：衍文】赤身倒挂审视而半截藏于梁内大惊呼众入看则彼紧闭双眼及人稍出避彼又开眼看人两臂在外两手尚在梁内举家仓惶里邻咸靚以为怪无疑矣聚观闾巷填塞众不敢隐鸣诸长官官遣巡检带弓兵携械至先试以枪刺之声如婴儿血出如注遂命以刀斫之血肉淋漓凝积遍地血下数斗首及两臂胸背全无寸骨尽血肉也旋命将仓房拆毁斧碎其梁梁已内空皆盛血块而已家人在傍白巡检曰昔造此房时一匠举斧悞伤他匠足面几断血流不止尽淌此梁木上木原有瘿血注瘿内彼时急于救人遂不留心及后上梁仍用此木日久想成此怪耶噫犹幸发之尚早倘下载尽变人形又未知作何妖孽耳

羽而两足者曰禽俗呼为扁毛畜生是也毛而四足者曰兽俗呼为圆毛畜生是也禽卵生兽胎生胎生者九窍卵生者八窍卵而陆生者目能开闭卵而湿生者眼无胞也常不瞑也胎生者眼胞开闭自上而下卵生者眼胞开闭自下而上惟鸚鵡两睑俱动如人目胎生九窍与人相同人顺生草木倒生禽兽横生人则女丽而艳禽则雄彩而文兽则不甚相较也家语云七主虎虎七月乃生三主狗狗三月而生四主豕豕四月生五主猿猿五月生六为鹿故鹿六月生诸禽兽无蛰禽惟黄莺紫燕兽惟黄鼠诸熊蛰与虫同阴鸟之飞也头缩而足伸阳鸟之飞也头伸而足缩马蹄圆为阳牛蹄拆为阴马之卧也起自前足牛之卧也起自后足是阴阳禽兽之各别也然月令雀入大水为蛤是禽化为甲虫也田鼠化为鴽是兽类化为禽也鹰化为鸇是禽化禽强化弱也他如牛哀化虎王妇化黿马生人取名马异此又禽兽阴阳人物之变而理有不可推者矣

禽之味美于兽俗云宁吃飞禽四两不吃走兽半斤鹤之膝后曲雀之足双行

有羊产羔人首羊身者众以为异达之朝朝臣曰此无足为怪不过牧童春兴耳予曾见鸡有四足两尾者猪有四肘之外更生四肘肥大异常生时猪母几死此亦无足怪者不过重胎与双黄蛋之类已耳

治喉闭用鸭嘴胆矾研细以酃醋调灌去胶痰即愈

治目障翳用熊瞻【瞻：胆】少许净水略调开尽去筋膜尘土入冰片一二片或泪痒则加生姜汁些少以铜筋点之绝奇赤眼可用

凡咽喉初觉壅塞一时无药以纸绞探鼻中或嗅皂角末喷嚏数次可散热毒

凡风狗毒蛇咬伤者只以人粪涂伤处极妙新粪尤佳诸药不及此治发背用干人粪阴阳瓦焙存性研细用醋调敷肿处即消

病痔者用苦蓼菜或鲜者或干者煮汤以熟烂为度和汤置器中阁一版其上坐以熏之候汤可下手擦苦蓼频频澡洗汤冷即止日洗数次数日即愈蓼一作苕北方甚多南方亦有之

金吾其形首似女人鱼尾有两翼性通灵不睡故取作巡警将军之号

羣鸟养羞羞者食也养羞者藏之以备冬月之养也

镜听咒曰并光类俪终逢协吉

两腋狐气名慍羝

骰子亦名琼□【音测亦音塞俗呼塞儿】

义嘴笛唢呐之名也身本是笛嘴则另具故曰义嘴即今假子称义子之意
【弹箏用银甲或以象牙玳瑁为之总名义甲】

自西洋人入中华其制造之奇心思之巧不独见所未见亦并闻所未闻如风琴日规水轮自鸣钟千里眼顺风耳显微镜雀笼之音乐聚散之画像等类不一而足其最妙通行适用者莫如眼镜古未闻眼昏而能治者杜陵老年花似雾中看唯听之而已自有眼镜令昏者视之明小者视之大远者视之近虽老年之人尚可灯下蝇头且制时能按其年岁以十二时相配合则更奇矣黑晶者价昂难得白晶者亦贵惟白玻璃之佳者不过数星今上下贵贱男女无不可用真宝物也人人得用竟成布帛菽粟矣至于算法又超出寻常之外远近高低大小多寡顷刻而知燎如指掌更上古所未有者也

溺器名虎子褻器原谓之兽子古贵嫔家制以铜形鬣尾皆具而背为大穴用距之以便溺兽子为马形取登距时如跨马之状意便于坐备雅观也今溺器多用铜锡若褻器尽以木为之名为马子或本乎兽子而变通之耶

淮南司马吴孝阶顺以吕纪翎毛大画见遗细玩果系锦衣真迹题曰五伦图上画太阳一轮中立五彩鸣凤取毛诗凤凰鸣矣于彼高冈梧桐生矣于彼朝阳之意盖言盛世君臣相合也森阴之下写二鹤取中孚爻词鹤鸣子和之意至于嚶鸣之鸟以兴友朋戢翼鸳鸯以兴夫妇在原脊令以兴兄弟亦皆见于诗人所共晓以丹青小技而拟极正大之题故可珍而可重也

画像繇来久矣笔墨之妙所谓传神在阿堵中未闻以泥可捏成者惟神鬼之像塑者最多盖

神鬼尽属虚幻谁见其真谁辨其伪近有高手能以团泥极熟对人手捏而成与生人之面貌肥瘦赤白苍黄须发痣点癍痕光麻无不酷肖俨然如生觉画工笔墨仍有未到之处相传其法起于虎邱老僧又云虎丘市泥美人之家夜梦吕真人教之者讹不可考姑苏维扬皆有其人寻常者每像数星身体皆活动者倍之若宰官则因人而施所谓君子自重也阅数年仍可增换此从前所未见者见之方三十余年耳

昔人所持惟纨扇最古宫中名为合欢扇班婕妤歌曰新制齐纨素皎洁如霜雪裁为合欢扇团团似明月后呼白团扇王珉嫂婢歌曰团扇复团扇许君自障面诸葛武侯纶巾白羽扇指挥三军谢安为乡人捉蒲葵扇唐诗云南风不用蒲葵扇纱帽闲眠对水鸥若今人所用多金白纸扇矣其扇本名折迭亦谓之撒扇取收则折迭展则撒舒之义明永乐中朝鲜国入贡成祖喜其卷舒之便命工如式为之自内传出遂遍天下其始不过竹骨茧纸薄面而已迨后定制每年多造重金者进御一面命待诏书写端楷一面命画苑绘画工致预于五月一日进呈以备午日颁赐嫔妃宫女其钉铰眼钱皆用精金每扇价值五金至本朝三百余年日盛一日其扇骨有用象牙者玳瑁者檀香者沈香者樱竹者各种木者罗甸者雕漆者漆上洒金退光洋漆者有镂空边骨内藏极小牙牌三十二者有镂空通身填以异香者扇头钉铰眼钱有镶嵌象牙金银玳瑁玛瑙蜜蜡各种异香者且有空圆钉铰内藏极小骰子者刻各种花样备极奇巧甚有仿拟燕尾更有藏钉铰于内而外无痕迹者其便面有白纸三矾者有五色缤纷者有糊香涂面者有搥金者洒金者命名不一其骨多而轻细者名曰春扇秋扇以香涂面者曰香扇可藏于靴中以事行旅者曰靴扇更有以各色漏地纱为面可以隔扇窥人者曰瞧郎扇且有左右可开制为三面暗藏其中画横陈像者曰三面扇有制样各别因地因人得名者曰黄扇川扇曹扇潘扇青阳扇而相传最久远者无如杭州之芳风馆其家世以售扇为业遂致素封城内构一别墅花木竹石颇极清幽予兼摄杭州府篆时曾过其园题以诗曰非不在城市寂然花竹间池成凹处雨石迭意中山为惜三春老来偷半日闲凭栏待飞鸟薄暮亦知还座间询及主人制扇之法乃出一扇曰百骨扇传已几世矣数之果有百骨初不以骨多而厚大其色古润苍细洵旧物也据云今亦不能仿造即强造亦不佳矣此予生平一见者若古之纨扇羽扇蒲葵扇亦间有用之者不甚多也

扇有折迭因而有坠伴阮兄曰扇器以蜜结迦南为第一其次则宋做旧玉之小者即虎斑金丝各色玉之新做者亦佳若琥珀蜜蜡之类品斯下矣

近有以合香桂花制成及玉枢丹紫金錠其价颇廉尽堪适用

琅环记云砚神曰淬妃考砚之制古今不一而唐人呼曰砚瓦盖谓砚形凸起如瓦非以瓦为砚也用久则平又久则凹矣剑南诗古砚微凹聚墨多今人呼砚曰砚台亦曰砚瓦

阳支子鼠寅虎辰龙午马申猴戌犬足趾皆单阴支丑牛卯兔未羊酉鸡亥猪足趾皆双惟跬已则无足耳

●跋

忆辛酉壬戌间履端随先君子检讨公官京师时观察公方髣髴陆生入洛之岁仲华拜衮之年常过邸舍与先君子论诗称忘年交记先君子曾语履端曰当今诗人接踵新城商丘者必以刘中翰在园为最谨识不敢忘今未刻篋衍集中先君子手钞葛庄诸诗尚在履端自壬午冬备员山阳校官职卑务闲时追随观察公学诗回想当年京邸趋庭绪语忽忽若前日事观察公喜著书一日出在园杂志示履端曰杂志上下卷不过就余耳之所闻目之所见身之所阅历随笔志之积久成帙非有成见作文字观窃附兔园册子藉供水天闲话已耳履端受而读之不禁悚然曰是书也核事物之原流贯天人之同异称名迹寄意远可以发人忠孝之思动人劝惩之志令人随事谨饬不敢放佚取其绪余亦足以资多识助谈柄岂如虞初诺皋仅同丛言脞史一二津逮及之也哉尝考唐时虞世南钞经史百家之书曰北堂书钞白乐天取凡书精语各以门类粹名为六帖后六帖者宋知抚州孔传所纂以续乐天之后传袭封衍圣公履端又尝读观察公年谱公少工举子业值旗籍停科以荫需次通籍历仕三十余年虽膺簪黻而铅槧随身藩溷侧理不殊儒素以故大而军国典要细而虫鱼琐碎靡不留心手辑乙未春孔东塘先生从曲阜来淮与观察公剪烛联吟暇读杂志先生轩渠拍手为公作序自言亦有稗海汇辑卷帙浩繁渐次成书如孔传所纂今在园杂志堪比六帖并驾北堂近日渔洋集中有分甘余话西陂卷内有筠廊偶笔俱脍炙人口在园杂志洵足肩随二书称鼎足焉则齐驱王宋者又不独葛庄诗也乙未立秋后三日陈履端百拜敬跋于袁浦学舍